

四庫全書

史部

欽定四庫全書

史部

雲南通志卷二十二

詳校官給事中臣李臺

刑部郎中臣許兆椿覆勘

總校官知縣臣楊懋珩

校對官編修臣盧遂

謄錄監生臣王思福

欽定四庫全書

雲南通志卷二十二

列女

民秉五行之秀氣以生而女德獨鍾坤順故古來
賢娃淑媛史不絕書即在僻壤偏隅亦必有懷清
履潔之操足以砥礪風俗敦崇壺教者滇為西南
夷地自星回一節羣弔阿南幾與五日靈均寒食
介子竝傳千古嗣是以還聞風興起代不乏人至

我

聖朝闡揚善類不遺幽隱

詔天下有司所在節烈必以上

聞表厥宅里且祠於類宮之門外九隆三竹間棹楔之
在門間者相望春秋從祀蓋蒸蒸焉錄其事記其
言不亦與共姜髧髧之誓伯姬下堂之誠後先輝
映於風詩史傳間哉志列女

雲南府

晉

李毅女

名秀父任寧州刺史光熙元年寧州諸蠻叛攻圍州城會毅病卒州人以秀明達有父風

推領州事秀獎勵戰士嬰城固守城中糧盡炙鼠拔草而食伺稍怠輒出擊破之城賴以全

元

段功妻

名阿禛梁王郡主功官雲南平章梁王忌而欲鴆之禛知其謀以告功不信遂遇害禛服

喪矢死哀其夫作詩詳見雜紀

馮文舉妻馬氏

文舉四川什邡人任雲南儒學提舉氏隨任明玉珍攻雲南城將陷夫謂

之曰某受國恩有死而已汝光州馬中丞孫女也其往從乎氏曰夫以義死妾生何益遂焚香北面

拜俱縊
於學宮

皇甫璇妻楊氏 桑知州妻李氏 景縣尹妻王氏

俱昆明人
以節旌表

明

李仁山妻楊氏

昆明人年十八夫卒生女未踰月翁
憐之諷令更適氏嗚咽斷一指曰指

續則嫁竟不能
強洪武間旌表

嚴士良妻吳氏

福建侯官人洪武二十二年隨夫戍
滇年二十夫卒撫孤苦守四十餘年

宣德間
旌表

孫彬妻謝氏

江南人夫為廣南衛軍永樂初氏隨戍交趾清化衛生子敬夫卒氏守節久之

有詔復安南國歸廣南同戍者強敬遜海而南潛歸吳下氏諭之曰汝父占戎籍汝私還勾牒必至是自罹罪也且滇吳萬里浮海叵測萬一不幸而葬魚腹而父其為若教之鬼乎乃與敬匿神祠中

睨同戍者過盡循故道歸孀居五十餘年壽八十八終敬後以軍功授本衛百戶

李暘妻黃氏

昆明人年二十二夫卒守節四十年奏聞旌表

盧英妻短氏

昆明人夫任右衛指揮氏年十九夫卒守節終身

劉潤妻趙氏

昆明人夫任後衛指揮氏年少誓死不二

張翎妻胡氏

左衛人夫卒斷髮自誓姑遘疾至再竭誠籲天醫藥輒效

趙宣妻朱氏

右衛人年十九夫卒誓死不二時南寧伯毛福壽征麓川回在滇謀欲娶之氏

曰善為我辭必欲相強惟有死耳卒不能奪守節五十七年壽七十六終屢被旌獎

方玘妻曹氏

後衛人夫早卒矢志守節後以子矩貴贈夫人大學士李東陽有可貞堂記詔

旌其門

南村婦

昆明人嘉靖間鳳賊之變被驅奔竄至南壩河自知不能前行掩袂投河而死竟不知為

誰氏女

閻厚妻金氏

昆明人夫為郡諸生氏年二十五夫卒無子號痛殞絕口鼻血流家人將屬纊

厥明復甦遂竭力養繼姑歷四十餘年

徐昂妻顧氏

昆明人年二十夫卒撫二孤曰行曰言行以舉人任合江教諭卒於官婦鄭氏

年二十七守志如姑

御史表其門曰雙節

楊氏女

名齊姑昆明人夫姓名失傳許聘未嫁夫卒守節終身萬厯時有司兩旌其門

良朝元妻郎氏

昆明人夫為郡諸生氏年二十夫卒撫遺腹子後亦夭折矢志不移紡績

自給壽

九十終

廖忠妻梅氏

昆明人年二十四夫卒甘貧守節撫二子應和應奎俱成立

孫宙妻浦氏

烏撒衛舉人浦仲良女夫昆明人氏從夫宦京師夫以上林左監丞卒於官二

子方在襁褓剪髮置棺忍死扶
櫬歸既葬慟哭不食死於墓側

周維新妻閔氏

昆明人年二十九夫卒撫諸子教以文業辟纊佐膏火苦節五十餘年臺

使旌其門後以子作樂貴封宜人

劉體仁妻孟氏

昆明人夫任保寧府通判卒於官氏匍匐間關扶柩歸里訓課諸子紡績

度日後以子文徵貴封安人又贈恭人淑人

楊東明聘妻陽氏

名羅平姐昆明人年十五許聘未嫁而夫卒女哀慟欲死以救得免

後母欲嫁之竟自縊死事聞建坊祠祀今永清門內烈女坊猶存

周允惠妻王氏

昆明人年二十九夫卒守節至九十歲終萬曆四十二年撫按司道咸

旌表之

姜愷妻吳氏

昆明人事未詳萬曆四十五年巡按御史吳應琦以節婦具題建坊旌表

王宓妻時氏

昆明人年二十四夫卒無子僅一女舍悲忍痛謹事舅姑後翁姑相繼歿女成

人遣嫁畢即自縊死具題旌表

張翹妻胡氏

昆明人家甚貧氏年少撫孤終身不易壽七十終

王僕妻段氏

昆明人年二十五夫卒子萬年在襁褓養姑教子守節三十餘年

劉悌妻常氏

昆明人年二十六夫卒家徒四壁矢死不二以女紅自給名其孤曰大節歷六

十餘年節既成立為諸生娶嚴氏節尋卒家道益替嚴亦甘貧守節撫其子舉於鄉鄉人稱雙節云

陳爰諷妻王氏

昆明人夫任吏部主事卒於京氏扶櫬旋里遇安賊之變罵賊而死年甫

十七崇禎十年長子履忠成
進士具疏陳情詔建坊旌表

魏昇聘妻

姓氏失傳昆明人許聘未嫁會其夫以罪遣戍騰衝父母謀為女別嫁有成說矣女

乃潛出自投水死覓之不得姻家將
訟諸官屍尋浮出漁者見之事乃明

秦春妻王氏

昆明人年二十二夫卒囊無尺帛矢死不
二歷四十三年壽六十五未及旌而

卒

吳鑰妻戴氏

昆明人年二十七夫卒
紡績自給守節終身

李光憲妻張氏

昆明人年二十四夫卒撫遺
子養舅姑守節四十餘年

張翔妻朱氏

昆明人年二十一夫卒守節勤苦持家
嚴肅事翁姑克盡孝道崇禎十七年具

題旌表
入祠

沈國英妻孫氏

昆明人與夫事孀姑張氏惟謹氏年二十四夫卒茹苦守節撫幼子林成

立孀居六十年壽八十四終其姑張氏亦孀居六十五年壽九十三終

杜久徵妻白氏

昆明人年二十二夫卒遺子甫二歲氏守節撫孤子年十九亦亡氏大慟

曰未亡人為有遺孤耳今子死我生何為遂自縊死

沐天波母陳氏

江南人沙賊之變天波自省奔迤西士民奉氏至朝陽庵聞其媳焦氏自

焚笑曰若能如此吾無憂矣亦自焚死

沐天波妻焦氏

江南人沙賊之變滇民奉氏至金井庵其姑陳氏遣人問計對曰吾家累

世重臣身為命婦當死宗廟遂舉
火自焚時幼女在旁抱之同死

沐天波女

名瑞貞甫十齡許配劉文秀子劉子痘殤
天波謂女曰汝婿死矣我將往弔及至文

秀第家人馳報瑞貞自
縊死遂與文秀子合葬

毛從讓妻劉氏

昆明人年二十四夫卒氏矢志靡他
撫子義成立娶魏氏年甫十八義復

卒遺孤禹一歲人以魏年少恐難守魏聞而嘆曰
吾姑不忍負吾舅而守吾夫吾獨忍負吾夫耶誓
死撫孤事姑倍謹一
門雙節人為難

林東標妻李氏

昆明人早年喪夫守節
五十二年撫五子成立

趙廷璧妻黃氏

昆明人流寇陷曲靖氏有妹適曲靖
蔣氏城陷被執投井死氏聞之泣曰

吾妹見賊而後死何若
先死之為愈乎遂自縊

薛之蕃妻楊氏

昆明人流寇至恐被辱與夫泣別率二女同縊死

楊順成妻舒氏

昆明人流寇潰兵肆掠氏恐為所污以毒物塗身剪髮垢面自灸成瘡為

隣婦所嫉訐其患處非真遂被執欲污之氏抗節不從自縊而死

王重光妻段氏

昆明人光卒矢志守節舅姑亡鬻產以葬教二子力學有成崇禎間旌表

祠入

艾龍光妻簡氏

昆明人夫病百法醫療無效及亡事姑盡孝守節四十年崇禎間題請入

祠

程世勲妻蕭氏

世勲後衛人官百戶嘉靖間督師討鳳繼祖之亂亡於陣時蕭年十八矢

志冰霜孝事孀姑李氏撫育

襁褓子道南垂五十年而終

竇康續妻謝氏

昆明人年二十九夫卒守節五十五年教子雙桂成名

陶希哲妻祿氏

昆明人年二十六夫亡柏舟自矢以紡績撫二子成人至八十歲而終

吳承祚妻繆氏

昆明人夫死無子甘貧守志垂五十餘年

李文徵妻熊氏

昆明人年二十五夫亡苦志守節撫子成人至六十七歲而終

羅必舉妻張氏

昆明人年二十而寡家甚窘堅志守節撫幼子偉成人孀居五十三年

方袍妻俞氏

昆明人年三十而寡子幼家貧矢志守節夜僅一燈紡績督四子環讀皆成名

屢奉
旌獎

劉傑妻吳氏

昆明人傑鄉薦任河間府青縣學博卒於官吳年二十八扶櫬歸葬訓子成立

至九十一

歲而終

完嗣昌妻太氏

昆明人聘而未娶氏年十六夫病篤氏往侍湯藥不三日而亡即守制不

回事舅姑二十餘年舅姑歿祭葬以禮苦節六十六年

施于身妻嚴氏

昆明人于歸甫七月于身以公車北上不第授仙居令值流寇倡獮道路

阻絕嚴毀容斷髮率婢鍼繡以養翁姑沙賊陷滇翁姑相繼歿拮据殯葬兼為夫弟冠婚授以家事時兵戈搶攘恐不能自全屢以死計因婢防視得免迨後氏髮皓然于身忽歸夫婦不能相識觀者

咸為
嘆息

施堯心妻龍氏

女全妹

二姑

適劉惟馨媳蔡氏

施于朝妻

金氏

施于國妻

姪女二姐

施堯明女適周文英

小妹

施堯道女適段恪

姪

媳傅氏

施于聘妻

孫女海長

于國女

孫媳朱氏

施濬妻俱昆明人龍

氏于歸七年而寡流寇入滇龍與媳女等自縊死時堯道女適歸寧人勸其隨父母潛避不可曰既為段門婦禍亂從夫禮也乃隨夫恪駕舟昆池匿蘆葦中寇兵搜海恪被殺氏投海死人傳施氏十烈賀彭妹

施于聘撫外家賀姓女隨傅氏縊死

嚴賓妻徐氏

媳白氏

嚴似祖妻

羅氏

嚴佩祖妻

施氏

嚴侍祖妻女

嚴氏 適李 孫女嚴氏 適萬 嚴氏 適張 壽貞二妹

姪媳韓氏 姪孫媳何氏 姪孫女淑貞 表姪

媳胡氏

俱昆明人徐氏尚書嚴清之季媳也年二十三夫卒苦節自守年六十四值流寇入

滇名諸婦女訓之曰我家世受國恩今寇至得死所矣遂舉火自焚鄰里救止之乃別徙一室與媳

白氏等相繼投繯死

嚴敦培妻任氏

昆明人在母家聞姑闔門死慨然曰我其從姑地下乎亦自縊死

楊思義妻陳氏

昆明人嚴賓佃戶聞田主闔門殉節隨夫投井死

范立朝妻王氏

曾孫女性存

昆明人朝平涼知府流寇至王氏堅欲盡

節子若孫以年老固留不可曰我受誥封不死為不忠汝等留我不孝與曾孫女性存懸梁繩斷赴

菱角

塘死

徐盛妻邵氏

女徐氏

自縊死
昆明人流寇入滇邵恐受汚

郭對妻葛氏

昆明人對楚雄訓導沙賊叛與楊畏知倡義守城及賊攻楚雄葛曰我先死勿

致君累庶可盡心

為國遂投井死

范應貴妻胡氏

昆明人以夫刑部員外封宜人流寇至避兵皇經館為賊執給賊曰我取

金錫與汝賊得錫甚喜氏急投井死
賊從井上以亂石擊之撈起頭盡碎

施堯敘妻傅氏

昆明人敘庠生傅聞賊將至即以死自誓及城潰遂與姪媳黃氏焚死

施于京妻黃氏

京欲殉難黃曰亦妾願也乃與其子濂隨叔姑舉火自焚

楊歸儒妻王氏

媳王氏

楊德溥妻

王駟驤妻趙氏

俱昆明人

王氏年三十夫歸儒卒守節教子歷三十餘年流寇入滇氏同媳王氏內姪媳趙氏避祠山廟後祖

居夾牆中為賊所獲給賊曰樓上多財物賊不及覺遂抱孫女啓後門與二婦投水月庵水塘而死

劉援妻楊氏

昆明人夫亡守節教子成立流寇入滇與妯娌子婦闔門自縊死

李為龍妻尹氏

昆明人居孀二十四年流寇至勒寡婦配軍氏持刀自殺

董邦昌妻王氏

妾何氏

媳段氏

董夢桂妻

女董氏

孫女董氏

二婢

俱昆明人流寇入滇避兵蘇家村聞寇劫掠懼為辱王與妾何

氏等聚一樓
積薪焚死

解從富妻李氏

解從應妻唐氏

俱昆明人流寇至
李與娣唐恐被辱

同局戶分左右縊死時以樓板合葬野田中
有樹挺然出墓後一本雙枝人謂雙烈所致

楊達雋妻羊氏

昆明人流寇初入滇氏即為畫節計
繳線為繩二一授其女一佩身及寇

至同女局
戶自縊死

邵愈謙妻阮氏

昆明人名端通書史年十八歸邵次
年流寇入滇闔家航昆池避亂為賊

搜獲氏已編髮聯衣於晏公廟前自沈而死賊大
感悔邵氏一姓俱得生全舟中几杙上寫詩三首
一曰烟波杳渺浩無涯肅羽哀鴻集淺沙風吹碧
浪千層逝那箇雲邊是阿家二曰珊珊環珮已飄

零汨汨濤聲不忍聽雁逝長空猶有懼魚潛水底
豈無驚白楊夕照何堪挹青冢淒風自足鄰欲識
此心何所似翹首西山月一輪三曰家室飄搖歎
陸沈涉險乘航意未申繡闥綠窻惟夢到葬入江
魚不染塵

王璠妻朱氏

昆明人流寇至同羣婦避地窖中賊覺
盡牽出氏持刀立斷已首賊大驚曰吾

未見敢死如此婦
者盡釋羣婦而去

朱運昇妻王氏

妾陳氏

俱昆明人流寇至同避昆
池中賊搜海俱赴水死

施于鎮妻楊氏

昆明人于鎮守越州將出征微有盜
巡意氏促之行鎮猶未果氏慷慨自

縊死

楊嗣昌妻孔氏

昆明人昌為郡庠生氏歸六年值流寇徵丁昌以代弟死安籠遺一子一

女氏矢志苦守丁亥寇勒寡婦配軍氏聞之急投井中數日以水淺得不死遂削髮毀容後子亦死

只一女相依苦

節五十年而終

薛大觀妻楊氏

媳孟氏

薛之翰妻

女夢雲

靜玉

婢

蘭馨

俱昆明人流賊肆掠大觀舉家至城北龍泉觀楊誓不苟活遂與媳孟氏等相攜赴潭中

死

金應斗妻張氏

昆明人年二十八夫亡撫四子皆成名孀居四十五年避兵羅母黃毛箒

潰兵至張厲聲

罵賊投河死

徐大妻竇氏

女大姐

昆明人潰兵肆掠竇與子學中并其女闔門自焚死

任允升妻趙氏

任允元妻薛氏

任允元女大妹

任允中妻瞿氏

任熙女黑姑

婢玉書

王

媽媽

俱昆明人流寇之亂趙氏等避兵羅母五道河為賊所覺相與投水死土人鑄碣識之曰

任氏一門八女死節處八女者合丁焜南妻任氏而言也

丁焜南妻任氏

丁炳南妻金氏

丁炳南妹小姑

俱昆明人同避兵五道河聞賊至俱自縊死

羅綺妻張氏

妹羅氏

昆明人避兵羅家營勢漸急張懼不能保對夫曰人生名

節所關萬一有失雖生
猶死遂偕小姑自縊死

熊才妻司氏

昆明人流賊至偕姻家李氏匿夾牆中
一婢為賊執逼指藏金婢曰問主母方

知賊出招黨司與李計曰事急矣遂各
抱幼兒女從後門投南壩盤龍江而死

張耀妻李氏

昆明人同司氏
投盤龍江盡節

李舒秀妻李氏

舒秀昆明人氏原籍大興年二十九
舒秀卒氏撫孤守節艱苦備嘗及流
寇入滇子被擄有欲奪其志者氏剪髮刺面
卒能自全後子貴迎養壽八十二歲而終

高遇說妻何氏

妹高氏

姻家黃氏

俱昆明人流
寇至何泣拜

翁姑曰婦生恐失身死恐失養幸有夫在可無憂
也翁姑止之不聽與姻家黃氏并姑姊縊死一室

中

李祚昌妻謝氏

昆明人。流賊之變，夫被潰兵拷炙，氏厲聲罵賊，賊欲殺之，閉戶自縊死。

張翹妻周氏

昆明人。夫亡守節二十六年，賊兵肆掠，氏恐受辱，投井死。

周祚興妻楊氏

楊氏弟婦羊氏

周謙妻高氏

俱

明人流寇入滇，舉家避兵于石鼻村。楊年方少，且有身，謂祚興曰：「事急矣，妾懼不免，願一死以釋君累。」祚興泣止之，不聽。遂與弟婦羊姪婦高潛至一室，同縊死。康熙二十七年，巡撫石琳表其門。

朱鼐妻張氏

朱霞妻寇氏

俱昆明人。避兵官渡木龍村，賊至，妯娌同縊死。

楊三畏妻陸氏

楊偉妻汪氏

俱昆明人。同避兵，複壁中，賊覺，被執，窺二

婦皆少艾欲牽之陸給之曰待我梳洗同去賊喜甚陸櫛沐竟即抱子投井中汪亦相繼投井死

山崙妻趙氏

媳王氏

山應星妻

女二姐

三姐

山嶷

妻沈氏

女二姐

徐錫衮妻山氏

山崙妹

女大姐

王彝妻山氏

嶷長女

山姓同居楊氏

俱昆明人流寇至趙與娣

沈氏等共十人避複壁中賊將覺懼為所污相繼投縲死

施于鑽妻胡氏

施濕妻嚴氏

俱昆明人流寇之亂胡抱幼女同姪媳嚴

縊死

胡祭妻莊氏

昆明人以兵亂先縊其幼女遂自縊

嚴敏培妻丁氏

女錫慶

昆明人避兵變於北山丁聞敏培被擄同女縊死

嚴永培妻楊氏

昆明人流賊肆掠氏投雲津橋河而死

嚴恩培妻湯氏

昆明人避賊海子村賊至逼之氏大罵不從遂被害

夏思禹妻余氏

媳馬氏

夏思周妻張氏

昆明人賊至避

夾牆中聞鄰家拷掠知不免同縊死

何誥妻王氏

何詔妻江氏

俱昆明人王氏許聘未嫁流賊之變父送歸夫

家尚未成禮避兵石鼻村潰兵至氏投深崖得免夜抵桃園村潰兵又至復跳深箐已亥正月氏從容言於舅姑曰媳必死始免舅姑累次日同媿江氏投縊死

蘇騰吾妻陳氏

昆明人騰吾明末副將卒陳年二十七孀居四十五年流寇兵亂懼為辱

乃與妹陳氏并其媳何氏等同時縊死

程其信妻陳氏

其信任州牧入贅陳門氏

能詩年六十八值流賊之變同姊呼媳袁氏姪媳何氏曉以大義何袁慨諾下樓相繼投繯氏代姊題絕命詩於樓壁云風風雨雨幾朝昏四十年餘緊閉門今日殘軀勒謝帛留將冰雪贈兒孫復自題云任是彭殤總一坵饒將花誥亦蜉蝣辭明幸有知心侶何事依依更下樓懸二繩於梁分左右

縊死蘇應昌妻何氏

騰吾長媳

程默卿妻袁氏

其信媳

八月

姐陳氏婢年十七見主母欲殉節誓與同死三易其繩而絕尤為慘烈

卜國泰妻全氏

卜其昌女卜氏

俱昆明人全氏年二十八流寇兵至

與小姑卜氏
同時自縊死

楊嗣緒妻段氏

女大姑

昆明人已亥兵亂段
恐被辱呼女同縊死

趙從耀女長妹

昆明人流寇時潰兵入室從耀被拷
掠女聞之縊死夾牆中從耀不得已

指以夾牆有物賊毀牆見女披
髮睜目伸舌吞賊狀賊驚釋去

陳王烈妻梅氏

昆明人夫亡氏年二十六守節十五
年已亥潰兵肆掠梅急投井以救得

甦恐終不免於辱
復以頭觸井而死

嚴可富妻高氏

宜良人年二十七夫卒以女紅給諸
子讀書墓祭歸道拾白金八十餘兩

訪其主還之其子鎮娶汪氏未幾卒汪亦年二十
七生遺腹子容矢志如姑皆壽終鄉人稱為嚴氏

雙壁大學士李東陽作傳謝遷
為記巡撫都御史王啓為贊

李華妻王氏

宜良人少通孝經列女傳年二十一夫卒子甫三月撫之成立歷五十餘年子

入仕
籍

陳湧川妻程氏

宜良人年十九夫卒守節
訓子成立年八十五終

藍彬妻萬氏

宜良人年十九夫卒無子紡績以養翁
姑及翁姑歿身營殯葬如禮年八十五
終

周贊妻趙氏

宜良人年十八夫卒子德芳甫數月氏
矢志育孤既長為娶妻生一子德芳又

卒氏撫其孤荼苦

自廿年八十終

凌懋妻孫氏

晉寧人年二十四夫卒巨家慕其賢競謀委禽氏號泣截髮竟不能奪撫子克

溫舉於鄉詔

建坊旌表

蘇震妻段氏

晉寧人年二十一夫卒守節其姑欲奪之氏潛入暗室斷髮自縊姑覺救之乃

生自是閉門紡績以養

其姑號泣至喪明焉

唐銜妻陳氏

晉寧人年二十七夫卒家貧無子姑欲奪其志氏泣涕不從姑病嘗藥姻戚不

輕見守節六十年嘉

靖間巡撫表其門

王綸妻史氏

晉寧人年二十夫卒苦節終身奏聞旌表

蕭必達妻任氏

晉寧人年二十六夫卒家貧未能舉喪子甫一歲姑年七十氏紡績養姑

越二年姑歿兩喪在堂拮据殯葬苦節五十餘年撫子成立萬曆二十九年奉旨旌表

趙轉妻段氏

晉寧人年二十夫卒截髮自誓撫孤養親夫墓碑豫刊已姓氏以表同穴守節

五十八年萬曆三十三年奉旨旌表

胡道明妻王氏

晉寧人郡縣令如春女年十九夫卒家貧無子矢志堅貞孝養舅姑守節

六十六年萬曆四十五年旌表入祠

李名奕妻蘇氏

晉寧人夫病日夕籲天求代藥必親嘗夫卒氏年二十五以死自誓毀容

見志時翁姑年老二子尚在襁褓家窶紡績以給守節四十九年萬曆四十八年奉旨旌表

楊大韶妻孟氏

晉寧人年十九夫卒矢志養翁姑苦節五十餘年

瞿鳴鸞繼妻孫氏

直隸高陽人大學士孫承宗孫女子華任通海教諭迎養至晉寧州

遇流寇欲引去氏罵賊不辱為賊所殺被七刃以死

李志恭妻王氏

夫為呈貢諸生早卒二子皆幼有諷氏改適者泣曰吾與二孤相為存亡

耳後二孤皆為諸生氏以壽終萬歷二年奏聞旌表

張夔龍妻趙氏

呈貢人流賊之亂氏同三女及媳張氏避寇於城東石碕為亂兵所得顧

女與媳曰毋見辱惟一死耳伺間女與媳環拜而縊氏觸柱死

趙芭女

名淑姐安寧人夫姓名失傳女年十四許聘未嫁鳳賊之亂慷慨自誓以衣蔽面投河而

死詔建坊旌表

趙文秀妻楊氏

安寧人夫卒青年撫孤志操堅貞事聞旌表

王壘妻李氏

安寧人年十九夫卒痛哭求死母知其有遺腹以嗣續曉之乃止後生女不易

其志歷四十年萬歷十五年奉旨旌表

陳孟章繼妻田氏

安寧人夫任南京戶部主事氏年二十一夫卒號呼欲絕刺面毀形

事翁育女歷四十年萬歷三十一年題表入祠

陳應賢妻董氏

安寧人教授董維女年二十六夫卒子幼家貧紡績佐讀事繼姑朱氏以

孝聞歷艱茹苦五十餘年崇禎十二年奉旨旌表

羅天文妻洪氏

安寧人沙首之亂豫以利刃藏身後為賊所獲夫遂巡隨後賊欲殺之氏

給之曰此非吾夫也將入賊營氏遙囑夫曰君自歸我不相負遂出所藏刃自刎死

張維樞女

安寧人夫姓名失傳流寇至氏年二十一隨夫避羅辰島中為賊所獲欲污之誓死

不從賊怒刺死於巖下

羅肇龍妻楊氏

安寧人其母居昆明聞流賊至授以一繩期同死賊至氏即將母所授繩

自縊其母先殉節死

傅爵妻姜氏

三泊人年二十一夫卒撫其子教以義方士民嘉之白於臺使旌表

王衢妻陳氏

祿豐人年十六夫卒伯叔憐其無子欲奪其志氏赴水死賴鄰婦急救復甦奏

聞旌

表

王氏

祿豐人夫姓名失傳早歲夫卒家貧苦守事翁姑三十餘年及翁姑歿營葬事畢即自縊於墓

上事聞詔

建貞節坊

王業元妻許氏

祿豐人早歲夫卒貞節自勵阿克之亂祿邑受禍最慘氏乘賊未至先自

刎而死事聞

詔入忠節祠

王錫衮妾尚氏

祿豐人錫衮死沙賊之亂氏恐受污與錫衮弟婦俱自縊死

周氏女

祿豐人幼明慧有識年十五值沙賊之亂慮為所獲謂鄰婦曰女子身自完豈可委身待

辱乎遂閉

門自縊

陳梁妻劉氏

昆陽人年二十二夫卒人欲奪其志氏堅執不移終養翁姑撫兒成立年逾八

十萬歷時臺
使旌其門

李士馨妻耿氏

昆陽人年二十三夫卒斷髮入棺
勒名夫墓石守節終身有司旌之

高甫妻趙氏

昆陽人年二十餘夫卒筑居撫孤永矢
靡他歷四十餘年臺使旌其門卒祀於

祠

李兆旂妻洪氏

昆陽人崇禎間隨夫任廬江訓導流
寇陷城夫與幼子俱死氏號呼尋夫

與子屍僅得夫首領及左臂長子澄徒步負骨氏
衰服杖行撫按聞而憫之助金歸晨夕哭拜至終

身焉督學

使旌其門

吳國慶妻閔氏

昆陽人年二十三夫卒苦節
自守流寇陷城罵賊而死

張文彩妻王氏

易門人夫早卒氏年少堅志守節奉姑教子歷四十餘年足不履閭外詔

建坊

旌表

宋廷相妻梁氏

易門人年十八夫卒苦志守節萬歷三十年旌表

劉琛妻邱氏

楊林所人年二十二夫卒守志不渝遺腹三月生子緒撫之成立成化間旌表

鄭儒妻洪氏

嵩明人夫中弘治戊午舉人計偕卒於京訃至氏屢自縊以殉姑救免守節甘

貧與姑同寢食閨不踰衣不彩督課幼子成立

羅江妻李氏

嵩明人夫任南昌府推官遭疾氏每嘗藥而進繼以割股夫卒扶柩歸哀痛喪

明適有寇至抱遺像投水母姊救免
楚劫一空益勵苦節嘉靖間旌表

楊鈞妻李氏

嵩明人夫任永安州知州苦節自甘卒於官氏痛哭幾絕攜幼子扶櫬還里至

廣陽堡遇寇恐為所辱遂赴水死永安人思鈞之清高氏之節為建雙節祠於江干

本朝

傅景明妻唐氏

昆明人年十八夫卒堅守苦節歷五十六年事姑撫子孝慈兼盡康熙三

十年具
題旌表

熊卜尚妻梁氏

昆明人年二十餘夫卒有數月遺孤氏剪髮毀容堅操撫子遭吳逆之變

流離萬狀厥志不渝歷四十六年如
一日康熙三十二年具
題旌表

辛有耕妻湯氏

昆明人年二十二夫卒孝養孀姑喪葬盡禮撫育子女皆成室家貞心苦

節鄉里
稱之

戴高妻戊氏

昆明人年二十一夫卒刺喉噴血幾絕遇救而甦敬事翁姑嘗割股以療姑疾

課諸子
皆成立

郝翔妻蔡氏

昆明人年二十二夫卒自縊以殉姑救免後遭寇亂復投水死姑倩人撈救復

甦貧無立錐女紅養姑姑病焦渴食不下咽氏覓乳哺之三年及歿勉力營葬撫二子皆成立
以上三人康熙四十四年具題旌表

劉國正妻沈氏

昆明人年二十一夫卒子賓甫二歲有勸以他適者輒誓死家貧甚作飯

以奉翁姑而糟糠自啜翁姑相繼歿殯葬如禮教子成立

張良翰妻陳氏

昆明人夫為易門廩生氏年二十八夫卒三子俱幼家貧日夜紡績以養

孀姑姑病侍湯藥坐卧不少離及歿哀毀愈至教三子皆成立以上二人雍正元年具題旌表

楊玉龍妻丁氏

昆明人年二十五夫卒子崑瞰皆幼翁姑欲遣嫁之氏截髮見志翁姑歿

竭力殯葬後子瞰亦卒氏與媳撫孤孫苦節三十五年雍正五年具題旌表

成于朝妻王氏

昆明人年二十八夫卒三子皆幼氏誓死守節家甚貧紡績以事翁姑及

歿拮据殯葬如禮

王珍妻初氏

昆明人夫為邑廩生氏年二十六夫卒子尊賢尚幼矢志堅貞織紉以養翁姑

教子為諸生

張應坤妻完氏

昆明人年二十七夫卒子鈞甫三月氏哀毀不食翁姑泣曰如張氏一綫

何乃復食後翁姑歿
殯葬如禮撫子成立

謝履恭聘妻李氏

昆明人年十六許聘未嫁聞夫計請於父母欲歸謝氏奔喪弗許絕

粒不食父母乃聽歸謝氏撫姪對為
嗣孝事翁姑教育嗣子後對舉於鄉

楊桂柏妻王氏

昆明人年二十七夫卒二子朝元朝棟俱幼氏欲以身殉姻戚勸以姑老

子穉乃止孝事孀姑撫育二子後
朝元亦卒媳王氏矢志守節如姑

王應舉妻陳氏

昆明人年二十八夫卒二子皆幼氏痛絕復甦家貧拮据營葬有勸以改

適者以死自誓工紡績養孀姑
以上六人雍正九年具題旌表

林之秀妻李氏

昆明人年二十七夫卒甘貧守節孝事孀姑撫二子成立孫五人有抱孫

者五世一堂壽至百歲人以爲苦節之報雍正十一年具題建坊旌表

嚴崑妻尤氏

宜良人年二十三夫卒子應昌甫三歲氏矢志育孤紡績自給康熙五十年具

題旌表

陳黼宸妻倪氏

妾李氏

女陳氏

宜良人順治十五年流寇據滇

聞大兵至賊奔宜良氏同妾女避亂東山瀑布崖聞夫死路南與妾女俱奮身跳崖死

徐大聘妻陳氏

妾楊氏

宜良人順治十六年大

避兵紅石崖其夫爲寇所擄氏與妾亦被執恐見汚同投大赤江死僅存幼子璘以上五人雍正

五年具

題旌表

保亮妻楊氏

宜良人姑歿翁老兩目昏盲佐夫盡孝氏年二十夫卒僅遺一女氏矢志不二

撫姪為嗣翁以壽終喪葬皆如禮雍正九年具題旌表

劉遇平妻郎氏

羅次人年二十餘夫卒子甫三歲氏號痛欲絕姑繼歿翁娶繼姑趙氏

敬事之未幾翁及繼姑又歿皆勉力營葬守節三十五年雍正九年具題旌表

黃玥妻唐氏

晉寧人夫為諸生年二十一夫卒子夢祥甫兩月矢志堅貞事姑克修婦道守

節五十二年康熙十四年具題旌表

姚俊妻趙氏

晉寧人年二十六夫卒日夜悲痛粒勺不入口或以翁姑老子幼責之乃節哀

復食勤紡績供甘旨教子讀書翁姑繼歿守節五十四年壽八十雍正九年具題旌表

陳其敬妻楚氏

呈貢人年二十六夫卒時舅姑年皆六十餘紡績以養遺孤甫三歲宅後

有桑一株故夫手植每撫桑以哭桑為之枯雍正三年具題旌表

楊攄妻蘇氏

安寧人貢生蘇恩女年二十三夫卒誓死不二事翁姑克盡婦道子居業甫五

齡撫育成名康熙四十五年具題旌表

王養正妻洪氏

昆陽人年二十一夫卒有遺腹五月氏誓死以守後生子名順天撫育成

立苦節四十七年順天長娶楊氏與夫同事孀姑甚謹順天尋卒楊年二十五效姑守志訓子來賓為諸生歷三十二年俱於康熙二十四年具題旌表

吳澄淮妻楊氏

易門人年二十六夫卒養姑課子取給機杼間苦節特著雍正三年具

題旌

表

但齊賢妻王氏

易門人年二十五夫卒撫子襄成立襄又卒堅志守節三十一年雍正四

題旌表

年具

蒲葉盛妻李氏

嵩明人年二十四夫卒姑老子幼茹苦守節躬事紡績奉姑教子後子易

藩舉於鄉

張弘任妻蘇氏

嵩明人遇姑與夫疾俱割股療治弗愈夫卒時氏年二十六堅貞自誓事

翁孝謹撫子成立以上二人
康熙三十三年具題旌表

李朝宰妻段氏

嵩明人年二十八夫卒子甫六歲氏躡踊幾絕以子幼勉為撫育辛苦以

養舅姑守節三十九年

雍正九年具題旌表

王之賢妻陳氏

昆明人年二十八夫卒哀慟絕而復甦敬事七旬孀姑跪奉湯藥親滌溺

器撫成二子苦節四十六年

傅曰仁妻劉氏

昆明人年二十九夫卒勉力營葬終喪後仍緜衣素食惟以紡績為事奉

祖姑撫孤子克盡慈

孝守節歷四十四年

羅鴻漸妻王氏

元謀諸生王轟女年二十五夫亡能知大義養老撫孤姑歿喪葬俱盡禮

遇忌辰雖薄物必哭奠守節歷

四十五年次子一萃舉於鄉

於崇惠妻李氏

昆明人于歸後值兵燹奉姑匿山谷間食盡隨夫數十里負米供饗殮踵

至流血年二十八夫亡事姑益謹

撫二子俱成人守節歷四十五年

錢元妻雷氏

昆明人年十九夫亡親族勸之再醮氏不從孝養舅姑久而不懈舅姑歿喪葬

如禮守節歷

四十八年

張其能妻楊氏

昆明人武緣令楊葉女幼適張見夫清貧即遣回僕婢躬操井臼年二十

九夫亡欲以身殉翁勸諭乃止翁歿拮据殯葬盡哀盡禮次子誠舉於鄉旋卒氏與孀媳趙氏撫孫

苦節四

十年

戴國詔妻張氏

昆明人于歸未久夫染病卧床二載氏竭貲醫治夫亡年二十八家計日

窘而奉養老姑甘旨無缺姑歿事繼姑亦甚
謹教子桂讀書為諸生守節歷四十五年

閻俊妻劉氏

昆明人夫家貧甚氏紡績以供菽水克
盡婦道年二十九夫亡奉姑撫子備著

辛勤守節歷

三十二年

張玉龍妻李氏

昆明人年二十九夫亡養舅姑以孝
聞教子力田不失本業守節歷四十

年

葉政妻郭氏

昆明人明指揮郭啟元女夫貧罄奩贈
以佐膏火體無完衣終無怨言年二十

九夫歿撫育三孤俱成立本朝順治三年值沙
賊之亂恐為賊所污誘三子出閉門自焚死後向

高妻任氏凌雲妻陳氏即其孫媳曾孫媳也
三代相繼守節皆氏之風烈有以啟後云

葉向高妻任氏

昆明人以賢孝聞年二十六夫亡值流寇入滇連歲荒歉竭力女紅奉舅

姑以肥甘已則糟糠充腹舅姑
歿喪葬俱如禮守節四十六年

葉凌雲妻陳氏

昆明人年二十五夫卒姑老子幼家無寸產氏紡績養姑拮据喪葬終身

不茹葷血守
節五十九年

宋喬良妻紀氏

明晉寧百戶紀檜女年二十七夫亡人有以無子諷其改適者氏毀容拒

之依堂姪士璋家讒言構釁氏輒斥不聽
與士璋母唐氏和睦終身守節四十五年

宋喬超妻唐氏

昆明人年二十九夫亡矢志靡他夫之叔宦遊遇兵燹歸貧甚舅姑邀至

家中共爨數十年氏能體舅姑之心敬以事之與
姊紀氏同甘苦紀氏死為之殯葬成禮氏守節六

十年現年
八十九歲

萬鵬程妻楊氏

富民人年二十六夫執父喪以毀卒氏欲自盡親鄰以姑老子幼力止之

家既貧窶送往事居勤勞艱苦
歷三十七年教子軸成諸生

毛翰妻劉氏

安寧人年二十八夫卒子甫八月苦志守節敬事翁姑凡祭祀賓客必誠必潔

守節四十三年
教子成諸生

曹琛妻施氏

安寧人年二十八夫卒家貧紡績以養翁姑姑歿事繼姑尤加敬愛飲食必親

嘗衣服皆手自縫紉及翁姑相繼歿
哀毀號慟聞者淚下苦節四十二年

李懷城妻呂氏

嵩明人年十六于歸適姑病篤奉湯藥者三月晝夜不懈年二十一夫亡

紡績課子足不出戶
守節歷五十七年

李國榮妻蘇氏

嵩明人事翁姑以孝聞翁病劇嘗糞
卜之年二十六夫亡茶蘖自甘撫子

成立守節歷四十六年
九人雍正十三年具題旌表
以上十

續編已具題旌表者列於正編其經府州縣及
布政使申詳巡撫衙門查核的確將來陸續

具題者
列於續編

陳湛源妻黃氏

昆明人夫為諸生氏年二十二夫卒
涕泣謂姑曰子婦不孝適陳門五載

一無所出有死而已姑曰汝死則吾身更何所託
乃繼姪為嗣躬織以養姑姑歿喪葬如禮守節十

五年
而終

鄒近泗妻邢氏

昆明人年二十八夫卒親族勸之改適曰家貧如洗何所恃而守氏曰吾

能忍饑寒不能忍恥紡績度

日撫孤成立守節三十五年

鄭士長妻吳氏

昆明人年二十九夫卒自縊以殉母救得免士長本楚人客死無田宅賃

房以居子甫五歲氏晝夜紡績以供衣食遂至兩目皆眊守節三十七年

劉嘉彥妻陳氏

昆明人年二十九夫卒力貧守志孝事翁姑翁姑歿哀泣痛絕感傷行路

撫子成立苦

節二十七年

許天麟妻溫氏

昆明人年二十六夫卒家貧不能具舍殮鸞嫁時粧奩以營喪事葬畢入

房自縊姑救之得不死值凶歲姑病翁失明氏拮据以供藥餌姑歿喪葬如禮有所遺敝廬一區以

夫弟年幼推以與之守節
三十年教子文級成諸生

康茂才妻宋氏

昆明人夫為撫標兵氏年二十九夫卒家貧甚紡績撫孤苦節歷四十八

年

許珍妻尹氏

昆明人隨夫徙居河陽年二十九夫卒子幼家貧茹荼自守三旬九食冰操特

厲撫子成立
壽七十二終

王雄妻黃氏

昆明人夫為撫標兵氏年二十九夫卒子甫歲餘日夜紡績以養七旬衰姑姑

疾焚香告天願以身代及歿拮据以襄殯葬守節二十五年

王永德妻曹氏

昆明人年二十九夫卒家貧紡績養姑姑歿營葬撫二子成立守節三十

一 年

蔣德宣妻劉氏

昆明人夫病割股以救年二十三夫卒苦節撫孤教子元克繼醫學壹儀

備 著

馬成龍妻張氏

昆明人夫為撫標兵年二十九夫卒家徒四壁姑嗣歿竭力營葬辟纊度

日 饘粥不繼苦
節 二十四年

李春榮妻韋氏

昆明人年二十四夫卒子甫一歲矢志撫孤奉養祖姑及孀姑備極勤勞

喪葬以禮守
節 三十七年

吳德榮妻王氏

昆明人夫為督標兵氏年二十四夫卒養七旬孀姑克盡婦道喪葬如禮

遺孤尋卒氏泣曰夫死子喪寧惜餘生但念蒸嘗無主勉留殘息敝屋一椽紡績自給歷四十二年

何一貞妻符氏

昆明人年三十夫卒遺三子皆幼未幾伯仲皆亡僅存季子惠親族慮不

能守以言探之氏泣血自誓撫惠成立守節五十六年

胡汝英妻孫氏

昆明人年三十夫卒事姑克孝撫二子成立守節至八十二歲而終

楊芬妻趙氏

昆明人于歸九月而芬卒氏年十九勵志守節歷六十四年

繆汝恩妻章氏

昆明人汝恩中鄉薦卒於京氏鬻產歸櫬以葬撫四子成立守節五十餘

年

包光昌妻高氏

昆明人夫卒氏年十七剪髮結夫髮遂就縊以救得免守節六十四年而

終

邱成章聘妻金氏

昆明人氏年十八將嫁前三日夫暴病死氏聞欲往奠父母未允其

請氏志在必往於是聽之遂盛裝登輿至邱門上堂拜見舅姑及長幼諸親繼喚其家婢僕出叩畢入室更縗麻詣靈前哭拜如禮撫棺又哭至柩旁坐久之又拜靈易素服拜別舅姑諸親而歸次日除夕猶奉父母酒元旦拜祖宗拜父母畢易白衣僵卧不語不食父母苦勸終不開目至初九日方卒

洪濯妻孫氏

昆明人夫卒時年三十歲三子士勳士清士英年甫數歲當吳逆變亂之時家

又極窮績麻度日口食不充荼苦萬端撫育三子成立守節五十七年每遇舉旌之時氏輒不許曰

守節撫孤婦人分內事也豈樂
以此自見哉卒年八十七歲

楊偉妻陽氏

昆明人年二十二夫卒剪髮自矢孝事
翁姑竭力供甘旨而自食藜藿守節四

十三年教子
文元為諸生

李坦妻張氏

宜良人年二十八夫卒家貧如洗紡
績縫紉以事翁姑苦節五十二年

鐵峻聘妻馬氏

宜良人年十八許聘未嫁夫卒女欲
往赴喪父母止之令兩幼子伴女在

家而夫婦同往弔女給兩弟出
外登樓閉門服素衣投繯死

李孟祥妻文氏

呈貢人年十八夫卒子軫甫數月氏
事舅姑撫幼子拮据卒瘞未幾軫又

卒復撫孫瑞麟成立守
節六十二年壽八十終

張拱紳妻羅氏

安寧人年二十六夫卒有孤尚在襁褓撫之成諸生孝事翁姑姑歿奉繼

姑及晚年目盲事之尤謹守節二十九年

曲靖府

元

雅克特穆爾妻托克托氏

蒙古人其夫任副樞密梁王命率兵於曲靖以禦明師兵敗於

白石江馳歸氏閉門不納曰爾受梁王厚恩兵敗不死何以見王乃鳩其二男一女命侍妾曰我死舉火焚屋勿令辱我遂飲鴆而死

明

王子臣妻趙氏

南寧人年少守節正統二年有司奏旌其門

陳蕃妻任氏

曲靖衛人嘉靖間夫客死他郡氏年甚少生女甫周歲訃至朝夕呼號至廢寢

食翁姑令其改嫁氏給之曰媳既失所天但得葬夫不敢以子母重累翁姑也數月夫骸至氏縞衣攜女撫柩悲痛葬於漏澤園遂負女投於瀟湘江三日方得其屍女猶約於背督學趙維垣聞之達於臺使乃檄所司售地合葬旌其門曰貞烈仍建祠於墓立碑於祠復二丁以奉香火

楊威妻王氏

南寧人適威貧甚出荆布易書勉夫力學嘉靖乙卯夫舉於鄉旋任楚辰溪令

氏年二十一夫卒於官扶櫬歸葬一子繼殞苦節自矢事聞旌表

朱愷妻馬氏

曲靖衛人夫任本衛千戶早卒子茂未襲亦繼卒遺孫臣尚在襁褓氏曰子喪

所天託之於子子今復喪猶幸有孫苟寧死弗顧
朱氏祀其斬手遂撫臣及長娶同衛陸林女時家
計甚窘朝不給夕里戚憐助臣得襲如祖官未幾
臣復以疾卒或以家貧無依諷奪陸志泣告曰夫
亡恨不速死為祖姑在耳矢志不移紡績供養越
數年氏卒陸苦節彌堅先是嘉靖八年有司表氏
為貞節至是本府月給陸
米五斗表其門曰雙節

曹撐妻陳氏

南寧人夫卒氏年甚少翁姑逼其再醮
割髮自誓甘貧守節六十五年奉文旌

獎

李士升妻周氏

南寧人夫隨父任早卒訃至氏繪已
像於夫之右每日悲泣哀毀而死

李元靜妻楊氏

南寧人年少夫卒長子蕃華甫九歲
次子維華甫六歲家微族弱恐人奪

其志停夫柩於堂者十年常服衰經朝夕上食教二子習儒業皆為諸生

張神武妻呂氏

南寧人天啟三年奢酋水蘭叛夫陣亡氏年二十二聞訃躡哀毀昏死

者數祖姑力救始甦生女方二歲苦節自厲監軍巡按交奏夫忠婦節奉詔旌獎

林宜春妻伯氏

南寧人年二十九夫卒子得蘭得芷俱幼父母諷以他適氏以死自誓教

二子讀父書俱成名家法甚嚴子婦雖寡居不敢有情容年八十一終里黨重之

王民瞻妻朱氏

南寧人貢生廷詔女崇禎間翁宗堯任四川平武令攜其夫同往氏還母

家紡績自給辛若五年性至孝父母疾刲股以救流寇將屠城遂與父母弟妹共死燕山壁下

錢大用妻莊氏

南寧人九江通判器宇大夫任千戶流寇入滇夫語之曰吾分當守城汝

可遠避氏曰寧在城同死耳及城陷
攜幼女投井死夫後亦罵賊被殺

段尚雲妻周氏

南寧人流寇之亂為賊所執欲污之
誓死不從奮身投井賊提其髮氏以

爪傷賊手至於流血
賊怒以石擊之而死

王家冠妻潘氏

霑益人流寇入滇氏年二十七與同
鄉婦俱為寇獲至海家閘氏度不免

奮身投水死越數日屍
立浮水面容色如生

俞嘉言妻王氏

陸涼衛人夫任本衛指揮使流寇入
滇奉調赴越州防禦氏聞賊至州境

恐被辱遂率妾方氏
及幼女同赴井死

阮元聲妻杜氏

馬龍人夫以稽勳郎典陝西試卒氏
隨翁居曲靖流寇陷城氏罵賊而死

皇甫信妻魏氏

羅平人夫任銅梁知縣氏封孺人流寇陷城夫及子俱被害氏聞而泣曰

夫死於忠子死於孝吾死於節亦復何恨遂投井死

馮世傑母李氏

尋甸人嘉靖七年安銓之亂攜二子一女匿迎恩橋下為賊所獲盡攫其

簪珥褫其衣服氏泣曰婦人行則蔽面夜則擁燭一旦罹此逆凶生復何為遂投橋下自沈二子亦相繼投水死

李萬年妻李氏

鳳梧所人夫任本所千戶氏于歸年夫病瘋疾盡賣粧資調治夫卒盡哀

矢志苦守聞安賊臨城恐身被玷自縊於家

王愛妻徐氏

木密所人夫及姪王立俱與安銓戰死氏欲以身殉姑泣止之忍死事姑壽八

十九臺使

旌其門

袁謙妻蘇氏

鳳梧所人夫任本所指揮早卒氏守志不渝後遇安銓亂為賊所逼以刀引決

賊感而釋之
得保其宗

張濬妻馮氏

平糞衛人夫為諸生早卒氏守節終身嘉靖七年旌表

李文妻戴氏

平糞衛人年十九夫卒遺一女尚幼姑強欲嫁之乃自縊而死嘉靖間有司旌

其門

張武臣妻曹氏

平糞衛人夫任本衛指揮早卒氏撫二孤誓死苦守

董祖舒妻李氏

平糞衛人天啟二年霑益土酋叛城陷時其夫在省考選氏謂家人曰吾

輩女流寧死不可受辱遂
與長幼七人闔門自焚死

繆昌運妻譚氏

平糞衛人年二十二夫卒子以貞甫
三歲氏守節撫孤值流寇之亂家族

罹難貞年十歲被虜氏冒死尋之遇賊斷其右手
死復甦子為寇棄城下寇去母子獲聚辛勤教子

後舉於鄉守節凡

四十八年而終

本朝

浦聯泗妻劉氏

霑益人年二十四夫卒一子二女俱
幼氏哀毀骨立孝事翁姑訓育幼子

苦節三十八年雍正

四年具題旌表

吳傑妻呂氏

平糞人夫客死廣南氏矢志守節事姑
盡孝遠涉千里扶夫櫬歸教子峯成名

康熙三十七年
具題旌表

臨安府

元

張友直妻杜氏

通海人杜林之女年十八夫卒誓不改節教子成立壽八十二終至正間

旌表

明

邢奎妻江氏

建水人正統間隨夫戍廣西南丹衛年二十七夫卒廣人留之不能攜孤五人

負骸歸葬家貧甚苦守教
子後以子幹貴封安人

陸華妻薛氏

建水人夫為臨安土官氏年二十夫卒守節撫孤景泰間旌表

高源妻王氏

建水人年二十四夫卒子宏甫四歲氏紡績撫養成人以壽終

趙寧妻王氏

建水人年十九夫卒一女尚幼父母令其改志誓死不從苦守四十餘年後女

適徐景亦早寡

勵節如其母焉

曾麟妻曹氏

建水人年二十六夫卒孝事舅姑撫育幼子矢志不移成化間旌表

萬傳妻張氏

建水人年二十二夫卒無子誓死不二紡績以養舅姑終喪後乃痛曰夫歿無

嗣所以不死者為舅姑耳今吾事畢矣遂自縊於寢室家人救免苦節六十餘年

曾祥妻賈氏

建水人夫中弘治壬子舉人早卒氏守貞撫孤歷五十年子孫相繼成立奉旨

旌表

邢思明妻藍氏

建水人年二十七夫卒無子人勸其再適氏乃自縊鄰人救之不死壽六

十餘
終

繆忠妻劉氏

建水人夫早卒力貧守志子昇娶王氏昇卒亦與姑同苦節當道復其孤養之

馬敏妻楊氏

建水人年二十八夫卒撫孤終老

馬良妻周氏

建水人年二十四夫卒子喪苦節終身

張顯妻蔡氏

建水人年二十夫卒子坦甫四歲同妾趙氏年十九守節撫孤後坦長娶譚氏

尋卒譚年二十守志如其姑鄉人稱一門三節

彭景妻金氏

建水人夫病革託以老母幼子及卒守貞不負夫託鄉里賢之

何儼妻王氏

建水人夫中正德壬子舉人氏年二十五夫卒於京二子俱在襁褓家貧如洗

誓不改節貴族有屬媒覘其意者斥拒之諸姑以為言即欲求死教二子甚嚴巡按旌其門

萬昂妻王氏

建水人年二十三夫卒養姑撫子至親罕見其面有老媪誘言以探其意氏引

刀斷指其節凜然

李松妻歐陽氏

建水人年二十七夫卒遺孤僅三歲家貧取給紡績撫育成人壽六十四

終

王璠妻趙氏

建水人夫早卒氏年甚少哀毀幾絕苦節以老

孫孟麒聘妻胡氏

建水人許聘未嫁夫遘危疾女年十二私割股煎湯告於母使療之

數日夫卒即欲自盡賴母救得免竟歸夫家守志五十餘年院道獎勵月給以廩

張實妻李氏

建水人年二十二夫卒子甫二歲遺腹復生子氏撫二孤守節歷四十年

葉翠妻楊氏

建水人年二十四夫卒欲自盡家人防之得不死朝夕哀號嬰病託孤於兄而

卒

劉錕妻朱氏

建水人年二十七夫卒無子力貧守節紡績自養壽九十一終

朱湧妻梁氏

建水人年二十夫卒無子苦節終身

邢思義妻高氏

建水人年二十六夫卒無子悲號幾絕與一老婢紡績自給壽八十終

吳浩妻沈氏

建水人年二十四夫卒子在襁褓守節撫之成立

李樞妻高氏

建水人夫病革時以子女皆幼囑其鞠育氏許諾及卒守貞撫孤成立婚娶

胡銳妻葉氏

建水人年二十三夫卒養姑育子終無異志

曹鼎妻葉氏

建水人夫卒欲即死不得截耳置棺中聞者悚然家貧善事姑撫弱女冰蘖之

操聞於當道累加獎恤

毛鶴妻黃氏

建水人夫卒號痛幾絕獨居一室足不越閭限守節五十餘年

余洪妻徐氏

建水人夫任訓導卒於官氏芳年扶櫬歸葬苦節撫孤親鄰罕見其面

華玉妻普氏

建水人夫任指揮卒於兵事賞裝殆盡氏守貧育孤以壽終

趙士貴妻李氏

建水人夫卒家貧紡績育孤為郡諸生鄉人嘉之

蔡仁妻吳氏

建水人夫卒氏年少無子人勸之嫁剪髮誓死善養舅姑以終

任官妻李氏

建水人年二十餘夫卒守節課子每聞旌表輒不肯與謂為婦人分內事壽八

終十

伍應祖妻劉氏

建水人年二十二夫卒子幼甘貧事姑撫子成立督學旌其門

楊文光妻馮氏

建水人夫為郡諸生氏年十七夫卒無子剪髮入棺以死自誓或以舅姑

為言乃紡績以養及歿喪葬如禮守節凡四十年奉旨旌表

李完妻曾氏

臨安衛人夫任本衛指揮早卒氏以死自誓撫孤子仁成立仁卒撫孫中珍中

珍卒又撫曾孫五十餘年齋蔬自守嘉靖二十五
年旌表其門子婦樊氏孫婦趙氏皆孀居守志人

稱世

節云

譚敷惠妻李氏

建水人年二十餘夫卒甘貧養姑守
志不二歷五十餘年學使旌其門

張國相妻陳氏

張國卿妻王氏

俱建水人事未詳
郡守獎以一門雙

節

曹氏女

建水人曲江生員曹某女已字良家有武
弁養馬曲江強欲聘之女不從夜自縊死

劉世皞妻李氏

建水人崇禎四年普酋之亂度不能
免同媳曹氏孫女惠姐科姐啟姐閩

門死節巡按

題請旌表

沙鎔金女

建水人年十七未適人普酋之亂人民盡移城內獨女不肯出門託言腹痛卧牀父

母不能強隨
投染布缸死

夷女六姐

建水人以拒暴客死崇禎十一年院司旌表節烈立碑於西城道左

紅衣女

姓氏失傳建水人流寇陷城同女奴避亂木堆中為賊卒王福所獲女給賊尋藏金見一

井即投入女奴亦從之賊驚去亂
定後此賊竄籍建水嘗與人言之

蘇秉鈞妻陳氏

石屏人年十九夫卒子甫歲餘教之成立始終一志

李瓊妻蘇氏

石屏人夫卒氏年尚少苦節訓子鄉人稱之

楊雲鸞女

石屏人見父乏嗣誓不字人父病割股以救年六十八終鄉里罕見其面州人呼為

孝貞女奉
旨旌表

王家相妻楊氏

石屏人年二十七夫卒矢志事姑教子夔龍登進士萬歷二十二年旌表

楊鼎妻何氏

石屏人年二十五夫卒躬操機杼事孀姑吳氏形影相弔吳年八十三氏年五

十九一門雙
節詔旌其門

楊忠國妻王氏

石屏人夫中萬歷癸卯舉人氏年二十八隨夫赴京謁選夫病割股救之

不起萬里持喪歸葬事
聞旌表壽九十七終

王佐女

石屏人年甫十二為賊所劫欲污之女給賊入室中室有井即投入死賊咋舌而去

李茂妻周氏

阿迷人年二十八夫卒子女各二紡績撫育底於成立苦節特著

王勛妻趙氏

阿迷人年二十夫卒撫孤子就學後子婦皆卒再撫遺孫成立人以為難

楊本妻范氏

阿迷人年十五夫卒無子父母不能奪其志守節六十餘年嘉靖間監司表其

門

段文斐妻王氏

阿迷人夫卒氏年少撫孤貞操特著

楊懋妻萬氏

阿迷人年十六夫溺水死氏聞訃自縊其母救免遂自誓守節天啟間院道獎

勵

楊懋學妻湯氏

阿迷人年二十夫卒遺腹生子延嗣氏撫之成名孝事舅姑崇禎十一年

建坊
旌表

張暉妻李氏

寧州人年十九夫卒誓死不二苦節事姑弘治五年建祠旌表

楊誥妻尹氏

寧州人夫為諸生氏年十九夫卒無子守節不渝壽八十終正德十六年建坊

旌表

祁會妻張氏

寧州人年二十一夫卒舅姑欲奪其志氏斷髮自誓終始不渝壽七十六終嘉

靖八年旌表

孫應鵬妻戴氏

寧州人年十八夫卒事姑甚孝以節壽終事聞旌表

王紳妻張氏

寧州人年二十四夫卒撫育三子成名壽八十餘終崇禎五年旌表

王世昌妻董氏

寧州人夫中崇禎癸酉舉人任泌陽知縣死流賊之難氏聞訃欲自縊因

有子女甘貧勵節教
子成立壽七十七終

喬玥妻許氏

通海人年二十一夫卒守節自誓教子成名宣德元年旌表

楊以榮妻沈氏

通海人年十九夫卒遺腹五月利其產者謀令改嫁氏抱兒向靈號慟乃

自縊鄰婦救免守節四
十五年弘治三年旌表

喬楫妻曾氏

通海人夫卒子甫二歲剪髮毀容誓死不二善事祖姑守節歷五十餘年事聞

旌表

東欽妻盧氏

河南光山人翁任御史以事謫戍通海衛未至卒有司迫其夫行氏偕至通海

未幾夫征和泥歿於陣氏日夜號痛勵志自守有張姓欲求聘氏不從自縊於室救之復甦張乃謀

於其夫之妹給之從已遠避海外氏佯許之至海
畔投水死迄今死處水清如練者數尺嘉靖二十

三年
旌表

孫汝材妻段氏

通海人年十七夫卒家貧無子有勢
家謀娶之以死自誓守志終身嘉靖

二十八
年旌表

趙華妻孫氏

通海人夫卒撫孤廷相及長娶張氏年
二十廷相亦卒張撫其遺腹子守志如

姑人稱雙節萬
曆四十年旌表

台生妻黃氏

通海人年二十夫卒甘貧守節養孀姑
撫幼子宗族欲奪其志不從天啓五年

旌表

劉經妻張氏

通海人夫患疫顛天代死夫卒依孀母陳氏閉門紡績有求聘者輒抱遺孤痛

哭矢志不從天啓六年旌表

郝孟陽妻孫氏

通海人年二十三夫卒悲號欲殞以有三月幼子誓死守節事聞旌表

趙來憲妻李氏

通海人年十九夫卒遺腹生子民保氏斷頂髮誓死守節年七十餘鬢髮

俱白獨所剪處黑如少時事聞旌表

闕登庸妻台氏

通海人年二十二夫卒遺孤甫半歲有富豪欲奪其志氏齧指自誓百結

其衣教子成立事聞旌表

楊藩妻劉氏

河西人年十八夫卒無子守節而終嘉靖間旌表

王維新妻杜氏

河西人年十九夫卒守節
歷四十年萬曆十年旌表

葛阜妻夏氏

河西人夫為諸生氏年二十
五夫卒守節歷五十餘年

耿應東妻王氏

河西人年二十一夫卒守
節六十餘年事聞旌表

黃氏女

河西人未字遇賊於河邊賊逼之躍入河死
督學大書完名全節四字於死所石壁崇禎

十六年

旌表

張志聘妻耿氏

河西人許聘未嫁夫卒氏矢志守節
歸事舅姑克盡孝道壽七十餘終奉

旌表

祿萬鍾妻薛氏

晉莪人貞節守義
景泰間旌表其門

余必明妻楊氏

嘗我人年二十三夫卒子甫一歲家貧姑老紡績以養姑歿殯葬如禮子

文允長娶畢氏年二十二允亦卒有議婚者畢以死自誓守節如姑天啓間旌其門曰雙節

杜存愛妻王氏

嘗我人崇禎十一年土賊入境被執至石山嘴氏奮身投巖頭面皆破痛

罵不已賊大怒分裂其屍學使旌其門

趙署妻張氏

蒙自人守節八十二年撫育孤孫年至百歲以節壽聞

萬鑽妻王氏

蒙自人年二十夫卒父母迎之歸欲奪其志毀面不從撫育二子後俱死復育

其孫及其曾孫以禮自持老而彌篤三尺之童罕見其面兩為當事所獎

段繼母江氏

蒙自人夫早卒育其孤繼苦節不渝為繼聘萬氏未娶繼忽盲萬氏父母欲令

改適萬不從卒歸段門事夫甚謹繼卒從姑守節而終

楊日華妻向氏

蒙自人夫早卒時有王重儀者挾兵勢欲娶之氏不從舅姑懼禍乃歸之

母家卒為所迫屆期來迎沐浴自縊死

李秀實妻談氏

蒙自人年二十五夫卒於軍氏扶櫬歸葬矢志守節奉姑教子終始不渝

當道旌之

張廷祚妻李氏

蒙自人嘉靖三十六年土賊逼城夫兄廷佩與賊戰死夫赴兄難亦死氏

年尚少或勸其改節氏矢志不移苦節撫孤年九十餘萬歷間奉旨建坊書死義張廷祚妻李氏貞節之門勅有所天率同胞以死難揮戈生氣猶存求原哀遺骨而立孤崩城餘烈可想之語

胡啓愚聘妻樊氏

新安所人千戶惟卿女夫為諸生家貧弗克娶祖母欲奪而嫁之女

聞泣曰從一而終婦之道也聘即大義定矣胡可更耶乃自縊家人解其屍惟抱胡生原聘物時年

二十一隆慶三年巡按旌其門

杜雲漢妻吳氏

蒙自人年二十一夫卒安貧守節壽八十五終萬曆二十年旌表

本朝

鄒岱妻謝氏

建水人夫因慟母嘔血病甚氏年二十兩次割股救之不起堅欲身殉人勸以

翁老孤幼遂毀容茹素事翁訓子孝慈並著康熙四十七年具題旌表

萬璠妻邵氏

建水人夫為諸生遭父喪嘔血死氏年少哀痛不欲生以姑老子幼甘貧養姑

教子成名康熙四十
九年具題旌表

王璽妻張氏

遺建水人夫為諸生年二十夫卒堅志撫
腹子成人雍正元年具題旌表

許爾成妻李氏

石屏人夫為諸生早卒三子皆幼氏
苦志教育次第成名康熙三十年具

題旌
表

楊蘭芳妻湯氏

石屏人年二十一夫卒孝事舅姑教
子成立守節終身康熙四十八年具

題旌
表

顧王紀妻劉氏

寧州人年二十四夫亡截髮自誓勤
苦操持教子錫瓚為諸生守節四十

三年雍正十三
年具題旌表

陳堯妻官氏

通海人年十六嫁甫七日而姑歿氏哀毀逾禮後夫又卒遂勵志守節四十年

雖至戚罕見其面事繼姑克盡婦道教二子涵浩皆舉於鄉雍正元年具題旌表

李修妻譚氏

蒙自人康熙四十年土酋李世藩叛夫被害氏年二十一攜兩幼孤遠遁艱難萬

狀後二子又卒媳熊氏官氏俱矢死靡他一門三節康熙四十八年具題旌表

李金聲繼妻熊氏

蒙自人貢生熊軾女年二十五夫卒子渭飛士璉俱幼氏欲以身殉

前子璋救之不死善事孀姑撫育諸子守節三十年

李玉聲妻官氏

蒙自人年二十六夫卒子士珩士瑛俱幼矢志守貞衰姑以喪子悲甚氏

同其如熊氏朝夕承顏曲為解慰辛勤紡績課子成名守節三十年以上二人俱雍正二年具

題旌

表

續編

余天培妻曹氏

建水人年二十三夫遊學卒於外計至氏慟絕俟擗歸葬畢遂自縊以殉

鍾仁妻師氏

建水人年二十夫卒子甫歲餘氏矢死靡他耕織度日養葬哀翁夫卒時藁葬

荒野竭力為夫更卜瑩域以禮改葬焉

陳王明妻趙氏

建水人年二十夫卒子幼氏甘貧守節織紉以養翁姑每夜深猶聞機杼

聲

曹希彬妻劉氏

建水人年二十八夫卒堅貞矢志勤儉持家課子秉直為諸生

張孔聲妻楊氏

河西人年二十八夫卒子幼忍死以奉翁姑撫子成立壽七十六而終

張世儒妻張氏

河西人年二十九夫卒守節事繼姑極其誠敬姑失明氏每夕焚香為姑

祈禱未幾姑目復明人皆謂誠孝所感

澂江府

元

三姑

姓氏失傳新興人兩嫂一姑為元兵所虜行至團山不肯前皆被殺碧血流處湧出清泉州人

甃石為井建廟其上至今裡祀不絕

明

王安壽妻李氏

河陽人正統初夫應貢卒業成均任養利州州同前後十餘年氏居家孝

事舅姑後夫卒於官氏以無子守節葬祭翁姑如禮壽八十四終

李全妻張氏

河陽人年二十夫卒遺腹生子亦卒歷五十餘年守節不渝弘治間旌表

李君霑聘妻張氏

河陽人許聘未嫁而夫卒有姚瑛者復聘之氏潛往夫墳自縊獲救

誓死不嫁弘治間學使旌表

李愈祥妻黃氏

河陽人年二十夫卒撫二子以節終弘治間學使旌獎

杜誼妻楊氏

河陽人年二十夫卒子祥雲甫一月撫育成名壽八十七終正德間巡按旌表

楊永延妻董氏

河陽人年二十九夫卒堅貞自誓撫子女成立嘉靖二十五年旌表

江淮妻方氏

河陽人年二十二夫卒守節不移撫育二孤嘉靖二十六年旌表

楊涇聘妻秦氏

河陽人許聘未嫁而夫卒父亦隨亡女誓死事母終身不字有求婚者甚

力女引繩欲自縊後無敢言者嘉靖間院道旌獎

李宣妻陶氏

河陽人年二十八夫卒事姑撫子年逾八十嘉靖間撫按旌獎

陳必安妻王氏

河陽人年十八夫卒子天輔幼守節教子成諸生嘉靖間巡道旌獎

潘雲龍妻張氏

河陽人年二十六夫以貢赴京卒於道氏守志不移撫育遺孤以至成立

嘉靖間院道旌獎

徐麟妻王氏

河陽人夫卒氏年少守貞教子成立隆慶間巡道旌獎

速大用妻陳氏

河陽人年二十四夫卒守節撫孤歷四十餘年隆慶間巡道旌表

王守業聘妻袁氏

河陽人許聘未嫁夫出遠遊不知死所有求婚者女不從嫂強之女

自投於河母奔救免遂閉門不見其嫂茹蔬紡績志操彌堅萬厯間旌表

李春暉妻吳氏

河陽人年二十夫卒矢志守節孝事孀姑萬厯間巡按旌其門

李向陽聘妻施氏

河陽人許聘未嫁夫從親宦遊卒於外父母再擇配女誓死不從竟

以處子終事聞旌表

劉開熙妻師氏

河陽人年二十四值流寇之亂與夫攜幼子避難其夫驚散氏為賊所執

脅以威堅不受辱母子俱被害

王士奇聘妻陳氏

江川人許聘未嫁而夫卒守貞不字成化二十年建坊旌表

韓宗長妻張氏

江川人年二十夫卒事舅姑撫幼子壽九十終嘉靖二十年院道旌表

陳俊妻顧氏

江川人年十九夫卒撫孤守節壽九十終

賀璽妻程氏

江川人年少夫卒守節歷三十餘年

朱震春妻張氏

江川人年少夫卒守節養姑訓子歷五十餘年

陳幼學妻業氏

江川人出適甫歲餘夫卒遺姪三月誓死守節生子薦允撫之成立其小

姑陳氏未嫁夫亦卒誓曰我未歸而夫亡命也吾不忍再適以玷先人遂終身守節焉萬厯間俱奉

旌表

旌表

羅存德聘妻張氏

江川人許聘未嫁而夫卒誓死守節終身不字壽九十三終事聞旌

表

謝君用妻王氏

江南淮安人洪武二十三年從夫戍新興州其子仁并姪禮義過采石遇

盜度不能兩全乃棄其子攜二姪來新興夫卒氏守節四十餘年撫姪成立知州陳恕重其節白當

道旌之

張某妻楊氏

新興人夫名失傳氏年二十三夫卒守志養姑節孝雙全嘉靖間建坊旌表

王良富聘妻張氏

新興人年十四許聘未嫁而夫卒女聞訃哀號求弔不得遂自縊聞

於官令合葬時天啓六年也墓產連理樹樵者刈之復生

周士彥妻白氏

新興人年二十七夫卒家貧無子人曰無子何依氏泣曰夫婦之義豈以

子之有無異哉獨居守節族人憐之立嗣承祧

徐石麟妾楊氏

路南人年十六歸徐徐卒妻嫁氏撫其孤矢志不渝孤又亡復撫其孫成

人年八十餘終

本朝

吳士徽妻陳氏

河陽人年二十夫卒紡績撫孤誓死不渝守節四十二年康熙三十年具

題旌表

徐禧麒妻趙氏

路南人年二十二夫卒氏堅志守節課子致遠為諸生孫之楷舉於鄉康

熙三十四年
具題旌表

速世勲聘妻陳氏

新興人許聘未嫁而夫卒氏聞訃閉門自縊父排戶救之得不死自

是朝夕哀號剪髮明志卒歸夫家孝事翁姑備執婦道守節五十一年雍正元年具題旌表

李居謙妻奚氏

河陽人年二十二夫卒子尚在襁褓氏矢志守節三十年訓子璋舉於鄉

雍正三年具題旌表

譚陳堯妻官氏

路南人夫少孤伯父母撫養成立氏年二十八夫卒子未週歲氏欲自盡

伯母止之終身敬事夫之伯父母如翁姑撤簪珥不御未嘗笑見齒雖至親姻戚不踰閫與言

趙元彥妻李氏

路南人年二十四夫亡紡績養姑足不踰閫遺腹生子教之成立守節歷

三十四年 以上二人雍
正十三年具 題旌表

續編

常文樸妻聶氏

新興人年二十七夫卒無子屢以死殉親黨救止之勵志守節撫姪以繼

夫後孝事舅姑持身
以禮苦節三十八年

莊高取妻郭氏

新興人年二十四夫卒敝衣糲食竭力甘旨以養翁姑姑疾藥必親嘗而

後進撫二子
皆為諸生

段揚祖妻周氏

新興人夫卒氏少年守節事祖姑及姑養葬盡禮夫卒時有弟尚幼令同

二子就外傅夜則篝燈佐
讀後皆為諸生鄉里賢之

羅奇翠妻戴氏

新興人年二十六夫卒遺孤三人家窘甚脫簪珥以養翁姑及歿殯葬成

禮教子瑄為諸生族黨喪無措者常出女工所得助之

莫高妻王氏

新興人年二十八夫卒家貧甚紡績以養孀姑課子弗輟後為諸生姑之母乏

嗣亦迎養之及歿葬之盡禮人以為難

鄭文灼妻段氏

新興人年二十七夫卒欲自盡夫兄止之曰吾無子幸吾弟有一綫之脈

賴汝存之乃止晝夜紡績苦無油常炷香以取光教子甚嚴終身未嘗入寺廟後夫兄及姒歿喪葬

盡禮族黨稱之

李世發妻徐氏

新興人夫卒氏少年守節時姑歿翁年逾八十竭力奉事得其歡心撫孤

成立壽
七十終

武定府

明

張節聘妻李氏

和曲人年十八許聘未嫁而夫卒誓不更字嘉靖七年鳳酋之亂途遇一

男子執其手即以刀自斷之而死今東郭外有旌節碑記

李含英女

名五娘和曲人志在養母不適人鳳酋之亂刎頸盡節

成乃貞妻李氏

和曲人鳳酋之亂為賊所執撞地而死州守為之立墓

何天相妻高氏

和曲人萬曆三十五年阿克之亂城破夫令同走避難氏知無所避乃曰

今日之事有死而已先投八歲女於井次及幼女繼以身見者無不痛之

夏某妻趙氏

和曲人夫名失傳阿克之亂城陷自縊死

張韜妻俞氏

和曲人年二十夫卒守節養姑四十年如一日

楊春霽妻辛氏

和曲人性貞靜通經史年二十一夫卒堅志守節集古今烈女事作小囊

佩之壽八十五有疾卻藥不進曰六十四年清白可隨夫子遊地下矣含笑而卒

居之敬妻趙氏

元謀人崇禎末吾賊之叛城陷投井死

魏守恭妻胡氏

祿勸人夫為千戶遠出萬厯三十五年阿克之亂氏聞城陷率二子望闕

叩首遂自縊死

本朝

陳璿妻李氏

和曲人年二十七夫卒子甫二歲氏堅志苦節事翁姑以孝聞後子亦病卒又

育諸孫成立守節六十二年雍正九年具題旌表

錢溶妻何氏

和曲人年二十八夫亡堅志不渝奉姑孝謹教子啟賢成立守節歷二十九年

楊又清妻何氏

元謀人年二十八夫卒氏血淚交流目遂失明堅志苦守歷五十年撫四

子成名雍正九年具題旌表

廣西府

明

趙理妻張氏

郡人年二十五夫卒遺三子俱幼守節五十餘年萬歷元年巡撫旌之

郭尚賢妻趙氏

郡人初父母已許婚尋欲改盟更許豪家氏恥背盟自縊得救竟如其志

適郭善事舅姑姑病劇兩割股療之萬歷二十一年撫按旌之至今名其里曰賢孝街

趙信妻楊氏

郡人年二十七夫卒力貧守節有司旌之

暨希妻周氏

郡人年二十二夫役臨安隨知府朝覲卒於道遺一子大器氏聞訃死而復甦

紡績撫孤境遇不堪志節愈勵有大姓屢欲奪之竟不能移及大器應貢仕陳留隨任就養年五十六終大器以謁選尋父柩歸合葬云

羅賢英妻楊氏

郡人流寇至同村民避難石洞中夫出為賊所執翁繼出又被執逼令負

所掠物拷聲聞洞中氏聞之急出語賊求代翁負
賊喜得少婦遂釋其翁氏隨賊至環翠橋投河而
死

趙覺妻名氏

郡人夫卒欲以身殉慮親戚見阻居喪
若無戚容衆異之及將葬夜傍夫柩自

經死衆始驚歎
遂同穴葬焉

楊大謨妻段氏

彌勒人夫為黑舊哨戍卒萬曆三十
二年寇至奮勇殺賊死於陣氏撫其

孤以節自持翁姑欲奪其
志遂自縊天啓元年旌表

元江府

明

王諍妻黃氏

郡人早歲夫卒訓遺孤以儒業歷四十餘年萬曆十年督學旌其門

楊德先妻馬氏

郡人夫卒氏年少矢志守節壽八十終

何源清妻李氏

郡人年十八夫卒痛毀欲絕父母翁姑曲慰之竟飲毒死

何源深妻曾氏

郡人年十六夫卒守節終身

馬宗範妻白氏

郡人年十六夫卒守節五十餘年

李儒妻楊氏

郡人年二十三夫卒剪髮毀容願以死殉其姑寬慰之乃拮据襄事修婦職封

股以痊姑病撫遺腹子希聖為歲貢生守節三十七年

楊氏女

名曩察郡人母孀居無子女堅志養母誓不適人勢家欲強娶之以死拒獲免壽八十終

本朝

王德遠妻張氏

新平人夫為新嘗營兵撥入普威營挈氏偕往鎮沅夷叛夫死於陣氏抱

孤兒投火死雍正五年具題旌表

丁珏妾吳氏

貫未詳夫原任揚武壩巡檢氏隨任雍正十年猥賊叛夫被圍不屈死氏為賊

所虜義不受污遂被殺事聞優卹入節孝祠仍建坊旌表

續編

艾張顯妻楊氏

子艾瓊珍妻艾氏

孫艾馨妻陶

氏孫女老妹

郡人雍正十年同避猥逆於甘棠箐楊氏聞夫被害夜回村與媳艾

氏等同
時自縊

艾國用妻陶氏

艾國梁妻林氏

郡人雍正十年避
猱賊於箐見其夫

俱被害妯娌二
人回村自縊死

艾承顯妻曾氏

子艾瓊居妻朱氏

郡人雍正十年
遭猱變避於腊

冬村旁岩內賊勢漸
逼姑媳同時自縊

艾奇名女月止

四妹

郡人俱未字雍正十年逆夷
肆掠二女見父兄逃散同自

縊死

陳萬言妻車氏

子陳璠妻鄧氏

孫女玉花

郡人
雍正

十年猓變鄧氏見夫被殺先將三歲女玉花縊死繼隨姑車氏自縊於打連村箐內

姚春先母何氏

妻艾氏

見郡人雍正十年猓變何氏夫被殺遂自縊艾氏見

姑死亦自縊

李從龍母馬氏

馬氏女二妹

三妹

守志撫孤已居

成立雍正十一年猓變見子被擒遂自縊時女二妹年十五三妹年十三見母死兄擒亦同時自縊死

丁一鵬姪女丁妹

郡人幼失父母育於堂叔家年十六未字雍正十一年猓變全家逃

散伶仃一女投崖死

楊守恕妻袁氏

新平人年三十四雍正十年遭猓變夫妻子母六口俱為賊執賊將殺其

夫氏跪求身代及夫被害恐受辱伺間置未滿十齡楊如岡等四幼子投繯以殉

舒鳳翮女馮妹

新平人年甫十五遭猓逆之變目擊父兄被難奮身投水死

舒鵬翮女金玉

父為明經歿後母喻氏挈之依其叔鳳翮年十六遭猓變繼馮妹投繯死

開化府

本朝

王大周妻李氏

郡人年二十五夫卒矢志守節撫孤成立雍正三年具題旌表

鎮沅府

明

罕氏

威遠人土知州刀遜妻
事未詳明嘉靖間旌表

東川府

本朝

祿永明妾祿氏

郡人二子應龍應鳳先後襲土知府
皆為安氏謀殺衆議承襲不決氏遂

繳印請改設流官康熙三十七年奉
旨給
題贈恭人表其墓
瞻養終身雍正七年具

昭通府

本朝

劉崑妻張氏

四川人夫任烏蒙遊擊氏隨任雍正八年八月祿賊叛其夫力戰死氏聞即抽

刃顧兩女易璋可璋曰我為命婦汝為宦女義不可辱於賊揮淚而自刃之謂妾吳氏曰汝尚可無死當撫孤以存劉氏吳泣曰願同死子不能顧也亦自殺氏遂自刎死越八十日賊平始獲屍容顏

生如

楊天堦妻聞氏

夫任烏蒙守備祿賊叛拒賊於阿堡戶力戰死氏聞先令二女自縊隨亦

自刎

陳國政妻李氏

夫任烏蒙千總祿賊圍城氏同二女俱自縊

陳天錫妻張氏

夫任烏蒙司獄祿賊之叛氏與夫同死難以上四人及劉崑女妻吳氏

事 聞贈恤有差俱入
節孝祠仍建坊旌表

隴慶侯母祿氏

烏蒙土府祿天倫次女雍正五年慶侯襲鎮雄土府以匿奸革職改土設

流夷衆欲搆亂祿氏諭之曰我祖宗千百年來以忠誠著績今日之事宜安氣運不可妄動衆始解散及八年烏蒙賊叛煽誘鎮雄諸夷祿氏復飛馳各寨申諭大義情詞激切至欲自殺衆咸感悟氏身率屬夷環守州署協濟軍糧城賴以全總督鄂爾泰建坊旌之曰閨壺忠臣 題請封安人給官田二十畝
以奉祀事

大理府

漢

曼阿娜妻

名阿南，樸榆人。元封間，其夫為漢裨將，郭世忠所殺。欲妻之，南曰：「能從我三事乎？」

作幕次祭，故夫一焚，故夫衣易君新衣。一令國人徧知禮嫁，郭皆如其言。於六月二十五日，聚國人張松幕，置火其下。阿南俟火熾，乃焚夫衣，遂躍身入火。國人哀之後，每歲是日燃炬相傳為弔。阿南又名星。

回節

唐

鄧睽詔妻

名慈善，鄧川賧人。開元間，南詔欲併六詔，為一因星回節，名五詔宴會。松明樓慈善

止，夫勿行，不聽。乃以鐵釧約其臂，而別及至南詔，火其樓。各詔妻尋夫，骸不能識，獨慈善認釧得夫。骸以歸南，詔異其慧，以幣聘之。善以夫未葬為辭，乃歸治葬事，竣堅閉其城南，詔發兵圍之。三月，食

盡盛服端坐竟以餓死
南詔悔旌其城曰德源

元

段功女

名羌娜一名僧娜大理人至正間其父為梁王所害娜志在復讎後將歸阿黎氏出繡旗

示弟寶曰自我省事之日即聞父冤欲復讎於梁王專待汝長成繡此旗今七年矣我歸借兵夫家汝亦提父兵來會此旗為符咏詩而別

明

楊和妻施氏

楊璘妻趙氏

楊謙妻張氏

皆太和
人夫亡

守節有司奏聞成化二十二年詔旌其門曰
二孝三節楊一清周洪謨各為序記以表之

何偉妻趙氏

太和人夫以母病覓藥溺水死氏大慟亦死之詔旌其門

楊汝為妻陽氏

太和人年少夫卒撫幼子柩以女紅自給家人罕見其面柩登進士嘉靖

閭旌表

張守綸妻陳氏

太和人夫中嘉靖庚子舉人卒之明日氏隨自縊督學旌之

宋良臣妻郭氏

大理衛人夫任本衛千戶氏年二十八夫卒子應甫四歲甘貧守志撫子

承襲應亦以孝聞撫按兼旌之

周鳳妻袁氏

大理衛人夫任本衛指揮卒氏守節撫其子瑞娶徐氏瑞卒徐亦撫其子之冕

守節如姑撫按旌為雙節

崔喬遷妻李氏

太和人夫為諸生早卒氏矢志不二嘉靖間監司旌獎

劉君寵妻懷氏

太和人早年夫卒家貧苦節觀風者崇獎焉

楊洪妻釗氏

太和人年二十將嫁而夫病危父母欲改嫁不從竟歸楊侍湯藥踰月夫卒氏

遂自縊嘉靖間
郡守旌其墓

趙文振妾劉氏

太和人夫任通判卧病氏事之甚謹踰年如一日既卒氏送葬歸自縊嘉

靖間郡
守旌獎

王汝為妻楊氏

太和人參議楊南金女年二十六夫卒環土於室四十年家人不見其面

甘貧撫孤嘉靖
間督學旌獎

邵麟妻李氏

太和人年二十五夫卒家貧辟纊自給撫二子皆為諸生嘉靖間監司旌獎

沈秋妻楊氏

太和人夫卒衣不周身內族襪以紵衣氏曰夫子生不受人憐遂以敝服殮入

謂其有黥妻妻之風甘貧育子以勤苦終嘉靖間督學旌獎

王文妻奚氏

太和人年十八嫁甫三月夫客死於外氏以節自誓夫之弟欲得其產迫之嫁

氏不從生遺腹子幹勵志撫孤足不履閭幹長娶張氏家失火延及隣居時失火禁甚嚴幹畏法赴火死產業一空張亦矢志守節如姑教季子邦泰嘉靖己酉舉於鄉人以為姑婦賢節之報

趙鐸妻楊氏

太和人年二十五夫卒人欲奪其志矢死撫孤壽八十二終奪

楊濟妻張氏

太和人年二十七夫卒守志終其身嘉靖間有司旌其門

楊永茂妻周氏

太和人年二十夫卒無子甘貧守志齋居數十年隆慶間監司旌獎

陸彥妻陳氏

太和人年二十八夫卒無子守節三十年卒之日遺言以其產為陸氏祭田

楊模妻陽氏

太和人年二十夫卒於外歸櫬之日悲痛齧棺齒為之落守節以終

奚相妻韓氏

大理衛人夫任本衛千戶早卒氏守節不移鄉人重之

謝應寵妻楊氏

太和人年十九夫卒子甫一歲堅志守節紡績以養翁姑有勸其他適者

正色拒之以節壽終

沈應選妻陳氏

太和人年二十七夫卒止一子甘貧矢節備歷艱辛撫子成名年七十五

以子鯨貴受封

趙璘妻王氏

趙州人許聘未嫁有土官願納白金五百償其夫聘資又以黃金五十餽其父

父欲改字氏不從竟歸趙歲餘夫患疾不愈病中遺命更嫁氏盡髡其髮納夫袖中曰以此矢同穴

夫既卒父母舅姑強之嫁不從有富豪強委禽氏聞拊胸嘔血死嘉靖間監司旌獎

劉繼文妻鄒氏

趙州人年十六嘉靖間箐賊掠白崖氏走水田中賊於崖上張弩以恐之

氏曰寧射死必不從賊遂射之貫顙而死

胡洪妻馮氏

趙州人年二十七夫卒遺孤顯宗甫十七日甘貧誓節鄉人稱之

時啓東妻鄒氏

趙州人年二十夫病割股以救未幾夫卒無子甘貧守志舅姑歿力營葬

事冰霜之節
終始不渝

金印妻李氏

趙州人夫病氏割股進之及卒守節四十三年

馬明輔妻舒氏

洱海衛人夫任本衛百戶氏年十九夫卒孝養舅姑撫子承襲守節歷六

十餘年

張課妻劉氏

雲南縣人歸寧偕夫行遇賊於途避入蔡姓家賊追及之氏以身捍門賊欲劫

之厲聲罵賊賊加刃於頸曰速殺我我不受辱也刃矛交集數創後猶裂裳塞痛捍門不移竟死門間其夫獲全天啓五年有司上其事祀於祠

張氏

雲南縣人夫姓名失傳賊李萬春掠其鄉氏被虜欲污之不從罵賊而死

胡濬妻奚氏

鄧川人夫任中前所千戶氏年二十二夫卒姑憫之令改嫁氏曰娶婦以養母

也母無他子誰適為養姑不能奪其志天順三年詔旌其門

阿旻妻陶氏

鄧川人夫為本州土舍氏年二十六夫卒撫孤守志三十餘年弘治間旌表

楊冕妻孫氏

鄧川人年二十五夫卒守志不壽百有三歲當事旌其門

楊儼妻尹氏

鄧川人夫卒氏年少守節撫子九齡齡卒其妻亦守節如姑

楊敬妻秦氏

鄧川人年二十四夫卒撫二幼子後卒又撫二孫壽七十終

張先翼妻楊氏

鄧川人年二十三夫卒欲自縊衆救之因齧指自誓有司旌其門

艾自新妻何氏

鄧川人夫為選貢生氏年二十六夫卒苦節教子萬歷間院道給米旌獎

楊一鶴妻段氏

鄧川人年二十六夫卒守節教子克成夫志萬歷間旌表

李昇妻楊氏

浪穹人年少夫卒矢志撫子友蘭以逸才應選嘉靖間巡按旌其門後氏卒友

蘭廬墓

盡哀

劉廷弼妻李氏

浪穹人年二十夫卒欲以身殉衆謂二孤在遂忍死守節五十年撫孤成

立嘉靖時
臺司旌之

楊鑑妻李氏

浪穹人年十八夫卒遺子甫一歲矢志守貞艱危不易課子及孫皆成名隆慶

時巡按

旌獎

楊燦妻李氏

賓川人年二十四夫卒舅姑老紡績以供聞有求娶者毀容斷指年五十終

張奇學妻王氏

賓川人姑病割股救之夫病又割股崇禎十五年遭兵變被執知不能免

負三歲子
投井死

楊渭妻陽氏

雲龍人年少夫卒子寅佐甫八歲氏矢志守節忍死茹荼孝養公姑撫育弱息

後氏病子寅佐願天請代剗股進羹學使旌曰母節子孝

本朝

趙應龍妻黃氏

太和人年二十九夫卒守節六十餘年撫孫士傑成立康熙三十年具

題旌
表

陸萬頃妻楊氏

趙州人順治十五年氏年二十五賊兵至欲避無門引刀自刎死越數日

顏色
如生

時際明妻王氏

趙州人廩生王曰都女順治十六年氏年二十與夫及舅姑避兵楊柳沖

夫為賊所執將殺之氏出以身禦賊曰釋我夫我願從去賊果釋之氏顧夫去遠度可脫遂引刃自刎死血噴賊衣賊亦為之流涕

楊朝棟妻蘇氏

趙州人廩生蘇濟女年十九夫卒矢志守節順治十六年避兵莊西穴中

為賊所逼自刎而死
三人康熙元年具題旌表
以上

李應和繼妻楊氏

雲南縣人年二十夫卒撫前妻子成立壽七十一終康熙二十四年

題旌表具

胡大業妻侯氏

鄧川人夫為諸生氏年二十二夫卒子舜正甫二歲氏欲以身殉夫姑囑

之曰有藐孤在勉留撫之氏從姑訓
茹荼自甘撫子成名守節四十六年

趙履祥妻卞氏

鄧川人年十九夫卒氏哀痛欲絕親
鄰勸以翁姑年老無依且有遺腹宜

留身以存趙嗣氏忍死勉從後生子撫教成立苦
節五十四年 以上二人雍正九年具題旌表

曾景妻趙氏

賓川人年二十夫卒無子誓死守節事
翁姑孝謹翁姑歿夫弟二人方童稚拊

恤備至各成立受室撫姪為嗣守節
三十餘年雍正三年具題旌表

楊潤妻趙氏

太和人夫為提標兵氏年二十九夫卒
子在襁褓上有祖姑及翁姑皆衰邁氏

紡績以養喪葬皆竭力成禮苦節歷
四十年雍正十三年具題旌表

倪昌賢妻鄒氏

鄧川人年二十六夫卒子幼人有欲
奪其志者氏峻拒之居止數椽田無

半畝女紅自給辛勤教子雖饑寒不出貸鄉里親黨無從識其面歷四十二年雍正十三年具題

旌表

續編

楊知敏妻雷氏

雲南縣人年二十三夫病劇氏割股救之不愈遂囑以養親教子而卒氏

矢志以養孀姑未幾子殤姑憐其青年欲嫁之氏舉剪自截其耳姑驚慟乃令撫姪為嗣苦節終身

楚雄府

明

俞汝諧妻仇氏

楚雄縣人夫為諸生氏年二十四夫卒欲自縊以殉戚屬防救得不死窮

年閉戶惟一老婢相依雖至戚罕見其
面孀居五十三年萬曆三十年旌表

張大治妻謝氏

楚雄縣人年二十五夫卒氏冰霜自
矢內外咸稱之萬曆三十三年建坊

旌表

吳東岫妻謝氏

楚雄縣人年二十九夫卒苦節四十
五年撫育諸孤咸有成立萬曆三十

四年巡

按旌獎

謝應舉妻陳氏

楚雄縣人年二十七夫卒苦節四
十五年萬曆三十四年巡按旌表

丁大受妻羅氏

楚雄縣人年二十八夫卒守節壽八
十七終萬曆三十五年巡按賜粟旌

獎

施宏猷母蘇氏

楚雄縣人夫名失傳氏年十九夫卒守節翁姑憐其少勸之嫁輒痛哭誓

以死撫孤成名萬
歷三十七年旌表

丁雄妻趙氏

楚雄縣人年二十五夫卒守節教子歷五十年萬歷三十七年旌表

王定邦妻孫氏

楚雄縣人年二十九夫卒治家嚴肅日以忠孝節義訓迪二子承寵承憲

後俱死國難氏壽八十
三終萬歷四十年旌表

陳世武妻童氏

楚雄縣人年少夫卒矢志守節壽七十終萬歷四十年道府旌其門

喬惟嵩妻安氏

楚雄縣人年二十六夫卒守節四十八年萬歷四十一年巡按旌獎

戎璉妻伍氏

楚雄縣人年二十七夫卒守節壽八十八終

張時詔妻仇氏

楚雄縣人年十八夫卒子甫彌月撫之成立萬曆四十三年巡按旌獎

裴泰妻陳氏

楚雄縣人夫任百戶氏年十九夫卒族人逼嫁之以死自誓苦節訓子應章襲

職孝事翁姑終始如一壽八十終

李銓妻楊氏

楚雄縣人年二十六夫卒守節時翁姑老子幼拮据孝養殯葬兩喪皆能如禮

鄉里賢之

羅綱妻李氏

楚雄縣人年二十九夫卒子幼苦節自誓壽八十一終天啟三年院道旌獎

張延妻潘氏

楚雄縣人年二十四夫卒子洪烈甫四歲守節六十二年天啟間以子貴封二

品夫人建坊旌表壽八十五終

姚汝諧妻謝氏

楚雄縣人夫中崇禎庚午舉人卒無子氏志操貞勁苦節三十餘年巡按

旌獎

徐承惠妻王氏

楚雄縣人年二十六夫卒姑老子女俱幼氏誓死靡他竭力孝養姑病年

餘衣不解帶親嘗湯藥殯葬皆拮据如禮守節四十四年子國琦以孝稱崇禎十一年當事旌表

王象乾妻卜氏

楚雄縣人夫卒守節四十餘年恪遵夫命撫育三子崇禎十五年巡按旌

表

謝天葵妻王氏

楚雄縣人年二十九夫卒守節教子成名歷宦有聲壽八十二終

王俊妻嚴氏

楚雄縣人年二十八夫卒無子甘貧守節歷四十二年

麥稠妻杜氏

楚雄縣人年二十九夫卒誓死守貞父母不能奪養翁姑撫幼子苦節特著壽

九十終

邵敏妻戴氏

鎮南人年十八夫卒守節壽七十終萬曆二十八年院司旌獎

衛宜妻揣氏

鎮南人年二十三夫卒於戌氏矢志守節壽八十終

周瑀妻徐氏

鎮南人年二十五夫卒氏甘貧守節壽七十五終萬曆四十七年道府旌獎

段熙妻陳氏

鎮南人年二十夫卒氏守節不二十壽七十八終天啓二年院道旌獎

楊大名妻李氏

鎮南人孝子翹棟母也年二十夫卒矢志守節教二子成名壽七十終母

節子孝鄉里稱之

楊時泰妻何氏

鎮南人年二十七夫卒守節
養姑教子成立壽至百歲

陶濂妻梁氏

南安人夫舉弘治乙卯鄉薦第一卒時
家如懸磬子幼無依氏荼苦自甘守節

教子撫按
旌其門

楊淮妻陳氏

南安人年二十二夫卒守節力貧教子
不出閨門四十餘年萬厯間巡按旌獎

鞠以和妻楊氏

南安人年二十三夫卒無子矢志守
節撫姪為嗣生孫七人壽九十一歲

終天啓元年
院道旌表

楊璪妻羊氏

南安人年十八夫卒氏斷髮矢志撫孤
成立守節四十餘年天啓間有司旌其

門

楊煥袍妻陽氏

南安人年二十值沙賊之亂劫掠的祿村夫與翁皆被殺氏為賊執罵聲

不絕冒刃而死

滕秀宗妻金氏

定遠人年二十夫卒誓不二志撫二孤年踰八十而終嘉靖四十五年旌

表

包遇景女

定遠人未許聘值鐵索箐寇劫掠執之女誓不受辱為賊所殺隆慶六年院道表其

墓

王海妻錢氏

定遠人年二十八夫卒守節撫子友義為廩生歷四十餘年萬歷間巡撫旌獎

周國正妻張氏

定遠人年二十夫踰垣失足死氏舐其血情極哀慟踰三旬自縊以從

周孔徒妻孟氏

定遠人年少夫卒守節四十年教子昌祚成進士天啟間建坊旌表

周如盤妻陸氏

定遠人年十五夫卒悲涕不已願以身殉至夜死於屍側天啟間建坊旌

表

孟宗聖妻溫氏

定遠人年二十餘夫卒守志不二事姑最孝教子有方其子知性充選貢

以母老不仕色養終身氏壽至百歲天啟間院道旌獎

陳士心妻東氏

定遠人性誠孝翁吉甫邁病禱神願以身代疾篤割左臂進之翁疾愈後

夫有疾復割右臂以救亦愈天啟間院道旌獎

李大中妻張氏

定遠人吾賊之亂兵至劫掠氏恐為所污投河死

蘇蘭妻董氏

廣通人夫為諸生氏年二十六夫卒撫二幼子孝事其姑嘉靖七年鳳賊之變

負姑遠避免難

壽七十五終

楊循正妻趙氏

廣通人年十八夫卒誓志不二課耕力織自養三十餘年嘉靖二十五年

知縣吳習表其墓

何景妻馬氏

廣通人年二十夫卒守節壽九十終天啟六年院道旌獎

馮天祥妻毛氏

廣通人孝事翁姑翁失明氏朝夕顧天誠動鬼神雙眸復炯後夫染疫癘

割股療之而愈

楊世恩妻韋氏

徐光鼎妻萬氏

俱廣通人崇禎五年野賊破城焚屋

氏等不受辱韋赴烈焰死
萬投深池死俱奉文旌表

段元臣妻王氏

廣通人崇禎五年野賊破城為亂兵所獲氏不受辱投水死

楊忠蕃妻陽氏

廣通人年十八夫卒守節事姑撫遺腹子成立鄉黨重之

何本洪妻李氏

黑鹽井人年二十二夫卒撫遺腹子光祖長娶媳李氏生子憲五歲光祖

亦卒李年二十三姑媳雙節
著聞天啟元年院道旌獎

楊伯堅妻李氏

黑鹽井人年二十五夫卒子甫三歲苦節三十年崇禎六年道府旌獎

景同春妾趙氏

琅井人春無子納為妾亦不孕春歿妻繼歿氏為立嗣殮如禮葬前一日

自縊死家人哀
之同穴葬焉

本朝

陳所養妻羅氏

趙州人夫楚雄縣人氏年二十九夫卒子甫一歲氏守節撫孤巨細一規

於禮歷數十年足跡不履外庭雍正三年具題旌表

謝泰來妻金氏

鎮南人年二十四夫卒甘貧守節紡績以養翁姑事繼姑尤加愛敬撫孤

偉為諸生設家塾以教宗黨子弟之貧者康熙五十七年具題旌表

張天瑄妻孟氏

定遠人夫為諸生氏年少夫卒養姑撫子守節三十六年雍正三年具

題旌表

袁尚義妻李氏

楚雄縣人年二十四夫卒奉事翁姑生養死葬備極辛勤待諸子姪咸有

恩禮三代同居守節三十九年為宗
族母儀雍正十三年具題旌表

白璋妻王氏

楚雄縣人夫為鎮標兵氏年二十九夫
卒子甫一歲孝養孀姑紡績教子守節

四十四年雍正十
三年具題旌表

姚安府

明

高惠妻譚氏

姚州人夫早卒守節終
身成化元年有司旌獎

陳友忠妻魯氏

江南人隨父戍姚安所年二十八其
夫戰死交趾子甫二歲人勸之嫁以

死自誓守節六十餘
年成化三年旌表

劉濟妻胡氏

姚安所人成化間夫卒無子誓死守節有司旌之

靳志妻趙氏

姚安所人生子七歲夫卒守節及子又卒撫其幼孫弘治元年郡守旌其門

徐淮妻龔氏

姚州人夫為諸生早卒氏守節四十餘年課二子皆成名萬曆四年有司旌獎

蔡銓妻張氏

姚安所人年少夫卒子甫七歲守節終身萬曆八年院司旌獎

徐化妻陳氏

姚州人夫歲貢卒氏甘貧守節教子體震成名萬曆三十二年旌表壽八十終

高守臣妻陳氏

姚州人年二十六夫卒守節訓子奉文旌表

郭之瑜妻何氏

姚州人年二十五夫卒守節訓子崇禎十三年臺使旌之

劉襄妻高氏

姚州人明末流寇遣張虎陷城氏懼被辱抱幼子投井死

王經妻張氏

大姚人夫為諸生早卒氏年少子鳴鳳甫三歲舅姑在堂生事寥落氏苦節自

矢後鳴鳳官縣令清節自持人以為母教弘治元年巡按御史楊銓作柏舟堂記以紀之

施經綸妻張氏

中屯所人夫卒於官臨訣託以養父母氏扶櫬歸有欲奪其志者泣謝曰

翁姑老矣違夫重託何以相見地下誓死靡他逾二十年而終

張震妻王氏

白鹽井人年二十夫卒撫子世榮成立娶婦李氏後世榮亦卒姑婦相倚守節

不變嘉靖五年提舉以雙節表其門

席上珍妻封氏

白鹽井人明末張虎劫掠入境其夫被執不屈死氏出走亦被執於治東

土主廟方入廟見深井欲投不得給守者曰汝閉廟門我安逃乎賊信之氏遂投井死今名其井曰

節井

本朝

魯達道妻李氏

姚州人孝事翁姑年二十八夫亡女紅自給教子如曾成人守節三十六

年

王希孔妻張氏

白井人年十九夫亡事舅姑以孝撫姪為子教之成立守節七十年

倪光捷妻王氏

大姚人年二十九夫卒族人勸之改適誓死不移撫孤子成立夫之叔孀

歿無子氏出貲為之殯葬且撫嗣姪成人以為難守節三十六年
以上三人雍正十三年具

題

旌表

永昌府

元

黃善妻張氏

名藥師郡人夫早卒家貧守志撫育遺孤定大德間氏年七十一尚無恙定赴

京訴其母之貞
操詔旌其門

明

夏寧妻葉氏

郡人年二十六夫卒紡績以養孀姑教子讀書成人洪武間旌表

李勤妻張氏

郡人年二十六夫卒生計蕭然竭力養孀姑撫幼子壽八十七終洪武間旌表

宋氏

金華人夫姓名失傳任閩中守洪武間被誣死獄中氏與其姑及子皆編戍金齒子死途中氏

奉姑以行有題郵亭壁歌云妾心汪汪淡如水寧受饑寒不受恥幾回欲葬江魚腹姑存未敢求先死前途姑身少康健辛勤奉姑終不怨姑亡妾亦隨姑亡地下何慚見夫面嘉靖十六年御史陰汝登立祠以祀三十二年御史黃中刻其詩於祠

張思仁妻王氏

山陽人隨夫戍金齒氏年二十六夫卒父母欲嫁之氏曰夫死遠方其父

母老其子幼女即不肖寧忍負手卒不能奪宣德五年旌表

梁貴妻邵氏

山陽人隨夫戍金齒年二十五夫卒攜孤收夫骨歸葬養其翁姑宣德間旌表

李其妻季氏

郡人夫名失傳早卒氏有色居板橋村景泰末都督毛勝鎮永昌遣人娶之時

勝勢炎灼聞者震懼父母皆勸氏不應坐卧以刀自隨曰再來即自刎勝不能屈竟以節終

白浩妻閃氏

郡人夫卒家貧子幼且罹多艱苦節堅持父母不能奪天順六年有司旌其門

謝定妻住氏

郡人天順間夫罷任四川開縣令僑寓不歸翁姑皆八十餘氏紡績以養之病

篤躬滌污穢及卒惟一小室鬻五金以葬人勸往求其夫曰彼不吾顧矣遂不食死巡撫陳用賓為

傳之

朱鑑繼妻徐氏

郡人年二十夫卒遺腹生子初其夫娶王氏生子五歲而王卒至是氏誓

死守志紡績以養舅姑撫育二子壽七十三終

俞富妻阮氏

俞祥妻黃氏

俞本合肥人明初籍金齒從征安南兄弟俱戰

死阮年二十黃年十九俱誓死守節學士汪諧表其堂曰貞節傳芳

胡來觀妻陸氏

郡人年二十一夫卒守志七十年成化六年旌表

吳貴二女

鞏昌人長曰貞烈次曰貞潔其父任永昌指揮卒於官子繼卒無嗣二女間關走闕

下哀求得移檄鞏昌取吳雄者嗣之二女竟誓守女節以終後合葬於郭外旌其墓曰吳氏二貞

閃訓妻馬氏

郡人年二十夫卒父母欲奪其志誓死不從事舅姑撫二子壽七十四終

早正妻

郡人阿昌羅板寨百夫長早正娶羅古寨土舍女為繼室三年正病妻事之謹一日語妻

曰我欲殺汝妻驚泣問故曰我死必矣兄死弟妻其嫂我阿昌俗禮也汝將與小叔為妻因此欲殺汝妻以有一女誓守節正不許妻不敢近未幾正卒妻大慟不食而死

朱正學妻張氏

郡人姑病篤醫藥無效自分必死氏拭穢而嘗之以慰姑曰醫言無害也

姑聞之

喜遂愈

梁毅女

名留姐永昌衛人年十六一日父母俱出外女獨居有俠少往挑之女大怒逐之泣訴於

母遂
自縊

戈諫妾韓氏

無錫人夫為永昌府舉人任東昌府通判時納氏為妾後官僉事卒氏守節自

誓或憐其少欲奪之氏自
縊於私室監司旌其門

趙璿妻鄭氏

郡人年二十五夫卒妾姑在堂幼子在襁日事女紅以給人勸改節鄭剪髮自

矢歷五
十年

蔣希賢妻袁氏

郡人年二十二夫卒無子止二女痛夫幾絕或欲奪其志氏誓曰生飲蔣

家水死葬蔣家墳遂蔬食布衣辟纊供食歷四十二年

劉儀妻李氏

郡人年二十四夫卒無子而貧苦節不移鄉人欲上其事辭曰夫亡守志禮也

何足異壽七十八終族人憐而葬之

袁必通妻張氏

保山人年二十九夫卒矢志不移後子熙亦卒遺二孫俱孩媳陳氏節行

如其姑氏守節五十餘年陳亦守節四十餘年

楊椿妻張氏

金齒衛人夫中嘉靖壬午舉人氏年二十五夫卒翁姑垂白子幼家貧氏勵志

守節歷四十餘年勉治三喪哀痛成病壽六十四終

劉傑妻毛氏

保山人年二十六夫由貢生任湖廣枝江教諭服闋攜家謁選至正定病大作

氏百計救之刺血疏神竟不起泣訴於巡撫得郵符與幼子麒扶襯歸艱窘備至壽至五十四終後

子麒嘉靖甲

子舉於鄉

閃應華妻穆氏

保山人年十九夫卒一子方在襁褓翁姑俱老氏拮据紡績至夜分聞雞

而起以供朝夕苦節四十年

瞿爵妻朱氏

保山人夫為諸生氏年二十三夫卒無子食貧守節養其舅姑嘉靖間旌表

潘承志妻邵氏

保山人夫為諸生嘉靖間氏年二十三夫隨父任卒於桃源二子方稚氏

茹荼撫孤竟夜紡績課讀時三喪竝集勤劬勸葬後子允孚為諸生孫一桂登進士官御史守節歷

五十

三年

周科妻張氏

保山人年二十九夫卒一子方幼族人利其家貲諷之改適不從既而百計恐

之皆不為動以死自誓教子成立守節四十四年孫良材登進士官吏部萬歷四十六年建坊旌表

陳大猷妻馮氏

保山人年二十五夫卒其父欲更嫁誓死不從翁姑垂老賴以奉養撫孤

姪如已子以節終

孔宗明妻劉氏

保山人年二十三夫卒紡績養翁姑茹貧撫子節操凜然

王重光妻段氏

保山人夫卒守節孝事翁姑鬻產營葬教子力學至夜分不寐屢經表揚

祀節孝祠

陳溥妻趙氏

易源鼎妻龍氏

李達妻席氏

俱保山人

夫早卒守節撫
孤為鄉里所重

陳謨妻田氏

保山人年二十三夫卒二子俱幼族人逼之嫁不從堅志苦節壽九十餘終

劉遇曉妻張氏

保山人年二十八夫卒氏守節不二撫子成立壽九十三終

周士玉妻楊氏

保山人年二十夫卒剪髮自誓其家甚貧晝夜紡績苦節三十九年

尹先哲妻戚氏

保山人年二十四夫卒家貧誓死守節撫子成人壽八十終子元媳張氏

孝養誠篤時稱一門節
孝巡按御史旌其門

朱廣運妻戚氏

保山人流寇之亂為賊所執氏給曰吾有私蓄請入取之賊信其言氏入

舍即投
井死

邱世第妻陸氏

保山人流寇之亂氏年少同夫負子避兵為賊所執氏給之曰待我解子

與夫惟命是從賊信其言即自刎死

周運泰妻吳氏

保山人為流寇所擄義不受污奪刀自刎死

朱絃妻閃氏

保山人遭流寇之亂自縊死其妹適丁長祐亦同時盡節

石應岷妾徐氏

田氏俱保山人夫中萬歷乙卯舉人歷官貴州威清道流寇至

永昌與威清不相聞正室丁氏謂徐田曰事已不測爾等將若何皆曰惟有死耳遂同自縊

王聖修妻水氏

保山人年二十一夫卒誓死守節時舅已七旬孝養備至子在襁褓紡績

教讀以至成立苦節二十年流寇兵亂母子皆被擄氏恐被污乘間誘其子出即觸柱而死

王啓龍妻吳氏

保山人夫任總兵流寇之亂氏與妾周氏將自縊人見而救之氏正色曰

君與吾夫厚宜速我死今反相救豈欲我等為蠻婦乎遂與周同縊死

姜成德妻楊氏

保山人流寇之亂縊死其幼子亦自縊

張世彥妻鄧氏

保山人年二十三夫中崇禎己卯舉人計偕卒於京子烈方二歲氏堅志

守節貧困不移撫子成立壽八十三終郡守旌其門

谷天生妻楊氏

騰衝衛人正統三年思任寇邊舉家出避金齒夫從征中嵐瘴死氏痛哭

遂自縊於柩旁詔旌其門復其家

張榜妻頓氏

騰衝衛人夫為諸生病劇氏年二十五涕泣不食豫置衣裝以俟一女甫七歲

貯一簣以畀之夫卒遂飲毒母以他藥救解夜分復自縊死正統間旌表

黃桂妻梁氏

騰衝衛人夫為諸生氏年二十四夫卒不御簪珥養姑教子姑歿殯葬薦祭皆

如禮年七十餘貞操如一日正統間旌表

華松妻林氏

騰衝衛人夫任後所千戶早卒氏年十七矢節養姑撫遺腹子復春襲職未幾

亦卒再撫孤孫以存華氏

林鳳妻閻氏

騰衝衛人年二十夫疾割股以進弗愈謂曰吾度不免汝少奈何氏泣曰所不

能從夫者以二子在襁褓耳敢有他志夫卒杜門深居孝事舅姑及相繼歿勉勸葬事天順間旌表

吳璽妻張氏

騰衝衛人年十八夫卒氏執節不二教子有成天順間旌表

張晟妻鄭氏

騰衝衛人夫為諸生氏年二十一夫卒矢志守節撫子邦教舉於鄉壽八十終

常應學妻梁氏

騰衝衛人年十八嫁甫六月夫卒氏撫膺痛哭隨自縊死鄉人哀之

陸緒妻王氏

騰衝衛人夫為諸生早卒氏守節不渝歷三十餘年

趙萬善妻陳氏

騰越人夫為諸生病革時氏多方調治不愈及卒自縊家人救之得不死

遂割耳以見志
督學使屢獎之

岳松妻陳氏

騰越人早寡矢志不移養姑教子嘉靖間臺使旌之

陳大道妻汪氏

騰越人年二十二夫卒撫孤守節終始一致

楊啟陞妻李氏

騰越人年二十一夫卒氏守節教子二十餘年

鄧文妻黃氏

騰衝衛人夫任千戶氏嫁年餘而夫卒守節不二婦姑相依為命者五十餘年

譚惟光妻沈氏

騰衝衛人夫任千戶氏年二十八夫卒父母欲奪其志氏誓死守節撫孤

崇本襲世職巡按
嘉獎之壽八十終

吳宗堯妾原氏

劉氏

俱騰越人夫任延平府同知卒二氏抱屍號痛俱服毒其

姑救之三日後原自縊劉殮原畢入卧内亦自縊啓視笥中殮物無不豫備事聞建坊旌表

林某聘妻段氏

騰越人年十七許聘未嫁而夫卒女守節不字壽八十二終事聞旌表

劉秉壁聘妻陳氏

騰衝衛人年十五未嫁而夫卒矢志守貞誓不再字紡績自贍壽六

終十

張本妻胡氏

永平禦人年二十八夫卒氏與妾陳氏同志守節歷六十餘年巡按獎其雙節

楊廷詔妻謝氏

永平人年二十夫卒無子矢志守節養姑盡孝壽七十終

丁烈妻張氏

永平人年十八夫卒遺腹三月家貧守節教子成立奉旨旌其門壽至八十終

吳氏

永平人夫姓名及氏行實俱失傳與張氏同時旌表貞節

吳承祚妻繆氏

永平人夫卒無子守節不二以女紅自給歷五十五年

廖惟燾妻吳氏

永平人事舅姑以孝聞夫卒守節終身

鄒天涯妻董氏

永平人流寇至氏被擄至玉皇閣下投井死

李煒妻董氏

永平人王自奇兵亂被擄不從投井死

本朝

張鳳翱妻童氏

保山人年二十九夫亡孝養舅姑喪葬盡禮撫遺腹子成諸生守節四十

年四

龐德俊妻王氏

保山人年二十八夫卒夫叔欲奪其志氏以死拒之撫孤子成立旋歿媳

改適氏復撫孫備嘗辛苦守節歷四十五年

范紹文妻黃氏

保山人年二十八夫亡甘貧守志孝養孀姑苦節歷三十九年

鶴慶府

明

許喬遷妻樊氏

郡人年十八夫以鄉舉卒於京舅姑欲奪其志剜目割鼻憤恨成疾壽六

十終郡守以詩輓之

李醜妻里氏

郡人年二十三夫卒一子懷抱一子遺腹後皆卒氏不易其操守節五十餘年

當事旌之

龐大治妻陶氏

郡人夫中嘉靖乙卯舉人氏年二十二夫卒無子有姑在堂家貧甚氏躬

績養姑有令其他適者矢死不從姑年八十歿喪葬如禮郡守表其門

劉旌妻張氏

郡人夫為諸生氏年二十三夫卒有遺腹斷髮誓志守節四十餘年

楊從宜妻李氏

郡人夫為諸生疾篤以父母幼子囑之氏遵遺命斷髮守貞當道表揚

奚賓妻彭氏

郡人年十八夫卒子甫二歲有欲奪其志者泣血自誓守節多年人鮮見其面

子女婚嫁辛苦拮据貧而且賢當事旌之

李時若妻李氏

郡人年二十一夫卒子富春甫二歲氏矢志守貞紡績教子春有不率輒

齧其臂泣曰爾父偃蹇以歿爾若此我何面目見爾父於地下春悔泣遂肆力於學氏病篤春嘗糞

頤天衣不解帶氏病尋痊當事旌曰節孝

李廷璋妻邵氏

郡人年二十二夫卒子鳳鳴尚在襁褓中氏冰霜自矢割耳守節鳳鳴後

為大使孫男數人氏口授經書俱成名當事旌之

楊嗣光妻阮氏

郡人明末隨夫任陽宗學官因兵亂回鶴至洱海亂兵四至避石洞中為

兵所獲氏激烈不受辱奪刀自刎死

段廷實妻尹氏

劍川人夫中嘉靖乙酉舉人氏年二十六夫計偕卒於京無子氏以死自

誓守節三十餘年直指旌之

羅雲鳳妻段氏

劍川人夫中嘉靖庚子舉人氏年二十六夫卒無子守節終身

張周聘妻張氏

劍川人夫苦學早夭時尚未歸欲往殉父母嚴守之氏伺稍懈詣夫冢自

縊因合葬

徐文宗妻張氏

劍川人夫為諸生氏年二十二夫卒遺腹生一子撫之成立壽七十四終

李樂道妻楊氏

劍川人夫為諸生事繼母孝氏事繼姑如其夫夫疾篤氏呼籲求代及卒

自縊
以從

楊桂生妻李氏

劍川人年少夫卒矢死靡他孝事翁姑撫子成立撫按建坊表之

順寧府

明

猛繼妻易朶

猛朋妻易喬

俱郡人洪武間以相夫成名西平侯上其事皆

贈恭
人

奉祿妻猛氏

郡人土司猛雍女夫任大侯土官嘉靖間父惑於後妻欲使改嫁土舍奉誥會

氏歸寧誥以木邦兵攻大侯掠其夫氏素衣獨居一樓父諷其服飾之陋女曰夫存亡未可知欲與

俱死何心改服乎父約奉誥將逼之民佩刀自防
數月父乃餌以毒氏恨不見夫留緬書一紙詞氣
甚悲巡撫王啓遣官奠且為之贊曰牝雞悍兒女
怨猛虎亂夫家散嗟嗟何日見夫面君不見祭家
姬雍家先血濺又不見劉家母王家翻受禪吁嗟
女兮豈不欲效雙飛燕破鏡難成片一紙緬書流
血撰黃泉路上見夫面

夜梅

郡人熨婦也萬厯間木邦侵境兵勢甚勁郡中
男子與之敵者皆北婦手持尺劍敗其黨百十

餘騎自是木
邦兵不敢犯

猛卿妻陶氏

雲州人年二十六夫卒哀毀欲絕
救而獲免教子成立節操凜然

朱錫命妻羅氏

雲州人萬厯間氏年二十八夫以殺
賊陣亡氏誓死靡他撫孤就學辟縷

飲血以勵其志子朝英由
選貢作牧新興閭里榮之

永北府

明

譚本仁妻姚氏

瀾滄衛人年二十九夫卒
守節訓子臺司旌其門

李喬妻范氏

瀾滄衛人夫任本衛指揮氏年十九夫
卒撫育孤子守節終身巡撫旌其門

李鍾元妻蔡氏

瀾滄衛人夫為廩生氏年十八夫卒
守節萬厯間建坊旌表壽八十四終

盧蕙妻甯氏

瀾滄衛人夫任思州府經歷銅苗
作亂氏被擄投河而死建坊旌表

本朝

袁佩環妻阮氏

郡人年二十九夫卒絕粒不食者數日戚長以姑老子幼勸止之遂紡績

針黹以養孀姑必誠必敬撫子為諸生康熙五十七年具題旌表

宋振麟妻趙氏

郡人夫卒氏年少茹苦守節養孀姑育孤歷三十一年雍正九年具題

旌表

楊大觀妻馬氏

郡人年二十六夫亡茹藥自甘養親教子竭盡心力守節歷二十七年

麗江府

明

高長妻木氏

郡人名藥師能土知府木森女夫任通安州土州同氏年二十夫卒撫孤成立

五十四年節操
之堅一洗夷習

木青妻羅氏

郡人夫任土知府氏嫁十年夫卧病竭力調治卒不起方在閔凶適有蕃寇慨

然曰彼以我新遭喪子在襁褓婦人無能為耳乃親掇甲躍馬先士卒一鼓克敵邊鄙以寧事姑盡孝教子以忠勤稱誥封恭人年五十一終叅藩謝肇淛紀其事

蒙化府

明

董朝儀妻羅氏

郡人年二十七夫卒遺子應元紡績教子成名正統間郡倖旌其門

趙奴宣妻楊氏

郡人夫早卒氏守節不以貧家婦缺菽水於舅姑撫子成立景泰六年旌

表

左綱妻張氏

郡人夫任土知府生子琳瑛夫旋卒氏肅清內政潛弭外侮勵志冰霜始終如

一二子相繼承襲
成化三年旌表

唐齡妻胡氏

郡人夫任百戶氏年二十夫卒遺腹七月生子政撫育承襲成化間有司旌之

左明理妻張氏

郡人夫為諸生早卒氏守節撫孤三十餘年成化間有司旌之

劉崇學妻陳氏

郡人夫卒氏年少孝姑育子操履端嚴弘治六年有司旌之

馮士傑妻詹氏

郡人弘治間夫卒氏年少家貧守節終身鄉黨稱之

官愍妻雷氏

郡人夫中正德庚午舉人早卒氏年少守節撫子慶倪鞠育教誨後任訓導

楊謙妻薛氏

郡人夫卒守節教子剛成名
嘉靖間巡撫提學交相旌獎

饒允泰妻廖氏

郡人夫任榮昌令萬厯間氏年二十
九夫卒撫育三子成立閨範嚴肅有

司旌
獎

楊仁海妻左氏

郡人沙賊破城被執不屈罵賊自投
於井賊復出之猶罵不絕口賊碎其

面釘
殺之

王維漢妻張氏

舊定邊縣人年二十三遇流
寇潰兵至被執不辱遂被殺

周國輔妻陳氏

舊定邊縣人猓賊屠城氏被
執不受辱賊剖其腹而死

本朝

芮翊周妻楊氏

郡人家貧如洗氏竭力相夫以奉翁姑翁姑相繼歿夫以哀毀卒一子尚

在襁褓氏日禱於天冀保孤兒以存夫後果獲成立苦節三十二年

楊之藩妻袁氏

郡人年二十八夫病刲股以救不愈氏堅志守節三十七年以上二人

題旌表
雍正九年具

續編

徐奮翼妻陳氏

郡人夫為廩生氏年二十九夫卒不食數日以二子幼忍死撫孤紡績度

日子稍長晝則令出就外傅夜則篝燈課讀學業不進輒痛哭責之曰爾如不才何以見先人於地

下長子敬學為諸生苦節三十八年

王肇興妻姚氏

郡人許聘未嫁夫病沈綿兩姓父母皆欲另議婚氏誓不他適夫病尋愈

遂成婚生三子氏年二十九夫卒奉事

翁姑甚謹教子柄為諸生壽六十九終

孫某聘妻徐氏

郡人夫名失傳年十四許聘以翁父俱歿不能嫁娶康熙十三年偽弁孫

龍韜徵糧於蒙聞其美遺以金帛遣悍卒登門逼

娶母兄無計女自度不免因給曰少待梳粧遂扃

戶取孫姓聘物洱海紅布纏身自縊死合郡驚視

顏色如生各捐金殯葬康熙二十九年同知陳文

成復以禮改

葬豎碑紀烈

景東府

明

阿曩

郡人土知府陶瓚祖母正統間麓川叛寇壓境阿曩諭瓚率衆禦之斬馘無算賊悉遁總兵上

其績封淑人

褒賜甚厚

劉藻妻陳氏

郡人夫卒氏年少守節終身誓死不二

本朝

續編

王應天聘妻毛氏

名正瑩郡人許聘未嫁雍正五年鎮沅夷賊之叛其夫從征至谷麻

染瘴而卒氏聞赴井死

雲南通志卷二十二